

# प्रभु यीशु मुक्तिदाता

भौत साल बेबिलोनियोंक गुलामी मिं रुणक बाद, यहूदी मैस फिर आपण देश मिं वापिस जै सकीं। लेकिन उनुकें पैलियक जस अजादी फिर कभै नि मिलि। बेबिलोनियोंक बाद फारस, फारसक बाद यूनानी, और यूनानियोंक बाद रोमी मैसोल उनुमिं राज करौ। लेकिन परमेश्वरल यशयाह नबीक जरियल उनुकें बताछी कि दाउदक वंश मिं एक खाश भौ पैद हवल, जो शातिक रॉज और मैसोकें बचूणिवॉल हवाल। उ सबनक न्याय करॉल और आपण राज हमेशाक लिजी ठैराल। यहूदी मैस भौत बेशबरील उ रॉजक इतजार करणाछी, और आब परमेश्वर आपण यौ वैद पुर करणिवॉल छी। उनुल आपण दूत एक नॉन गौं मिं भेजिबेर वाकि एक चेलि कें बता कि तु उ रॉजकि इज हवेलि!

## मरियमक दगाड़ स्वर्गदूतकि बात

(मरकुस १:१, लुका १:२६-३८)

यौ परमेश्वरक पुत्र यीशु मसीक भलि खबरक शुरुवाद छु।

इस्रायल देशक नासरत नगर मिं मरियम नामकि एक चेलि छी, जैक लगन यूसुफ नामक लौंडक दगाड़ है रौछी। मरियमक ब्या हुण है पैली परमेश्वरल आपण दूत कें वीक पास भेजौ। दूतल मरियमक पास ऐबेर कौ, "ओ मरियम, परमेश्वरकि किरपा तुमिं है रै!" मरियमल सोचौ, "यौ को छु, और यौ कसि किरपा छु?" तब परमेश्वरक दूतल कौ, "डर झन, देख, तु अड-भारि हबेर एक च्यल कें जनम देलि, और तु उनर नाम यीशु धरिये। उ महान हवाल और सबों है ठुल परमेश्वरक च्यल कहलाल और प्रभु परमेश्वर उनुकें उनर पुरखा दाउदक रॉज-गद्दी द्याल। और उनर राज हमेशा रौल।" मरियमल कौ, "यौ कसिक है सकुं? आइ तलक म्यर ब्या लै नि है रौय!" तब दूतल कौ, "यौ परमेश्वरक आत्मा और उनर सामर्थल हवल। किलैकि उनर लिजी के लै मुशिकल न्है।" मरियमल कौ, "जस परमेश्वर चां, म्यर दगाड़ उस्सै हो।" तब दूत वांबे गैब है गोय।

## यूसुफक स्वीण

(मती १:१८-२५)

यैक बाद वीक मंगेतर यूसुफ कै पत्त चलुं कि मरियम अड-भारि छु। उ यौ बातल परेशान छी, कि यौ कैक नॉनतिन ह्वल? उ उकै बदनाम लै नि करण चांछी, किलैकि उ एक भल मैस छी। यैक लिजी वील सोचौ, "अगर मी मैसों धै कून कि मरियम येसि छु उसि छु, तब वीक बदनामी है जालि। और नीमक अनुसार उकै मार द्याल।" तब उ चुपचाप उकै छोड़णक लिजी सोचुं।

जब सोचन-सोचनै उकै नीन ऐ जै, तब परमेश्वरल वीक पास लै आपण दूत भेजौ। और स्वर्गदूतल ऐबेर यूसुफ धै कौ, "तु मरियमक दगाड़ ब्या करणक लिजी नि डर। किलैकि जो वीक पेट मिं छु, उं परमेश्वरक तरफ बे छु, कवे मैसक न्है। उ एक पवित्र च्यल ह्वल और तु उनर नाम यीशु धरिये। जस परमेश्वरल वैद करि राँखछी कि एक अणब्यवाई चेलि अड-भारि ह्वेलि और एक च्यल कै जनम देलि जो आपण मैसोंक पापों बे उनुकै मुक्त करॉल, उ वैद ऐल पुर हुणौ।" तब यूसुफकि नीन टुटी और वील कौ, "अरे, यौ सांचि बात छा? जो मरियमक पेट मिं छु, उ परमेश्वरक तरफ बे छु, कवे मैसक न्है!" और वील स्वर्गदूतक उ बात मिं भरौस करौ, और मरियम कै ब्यवैबेर आपण घर ल्या। लेकिन वीक पास तब तलक नि गोय, जब तलक वीक च्यल नि है गोय।

## यीशुक जनम

(लुका २:१-७)

उ बखत यहूदी मैस रोमी सरकारक गुलाम छी। रोमी सम्राट औगुस्तुसल यौ हुकुम निकालौ, "हरेक मैस आपण नाम लिखूणक लिजी आपण-आपण पुरखोंक नगर जाओ!" यूसुफ जो दाउदक वंशक छी, उ लै आपण नाम लिखूणक लिजी बैतलहम नगर आपणि स्यैणि मरियमक दगाड़ आ। और वां धरमशावों मिं कै खुट धरणकि लै जांग नि छी, यैक लिजी यूसुफ और मरियम गोरुक गोठ मिं रई।

आँब मरियमक नॉनतिन हुणक दिन ऐ गोय, और वील वां आपण ज्यठ च्यल कै जनम दे। और उकै एक टॉल मिं लपेटिबेर घा खाँणी ढुट मिं धरौ।

## ग्वावों कै यीशुक जनमक बारि मिं बताई जाण

(लुका २:८-२०)

उ नगरक भ्यार सैण मिं थ्वाड़ ग्वाव छी, जो रात मिं आपण भेड़-बकॉरोंक देख-भाल करणाछी। तब एकाएक स्वर्ग बे परमेश्वरक दूत वां आ, और आपण चारों तरफ परमेश्वरक उज्याव देखिबेर ग्वाव डरि गयाय। तब दूतल उनुधै कौ, "तुम डरो झन, मी तुमर लिजी एक खुशि खबरी लिबेर ऐ रयूं! आज तुमर लिजी बैतलहम मिं मुक्तिदाता पैद है रौ। तुमर लिजी वीक यौ पछ्याण ह्वल, कि तुम एक भौ कै टॉल मिं लपेटी और ढुट मिं धरी पाला।"

तब एकाएक स्वर्ग बे भौतै स्वर्गदूत आई और परमेश्वरकि जै जैकार करन-करनै कूणाछी, "स्वर्ग मिं परमेश्वरक महिमा हो, और धरति मिं उं मैसों कै शाति मिलो, जनुकै देखिबेर परमेश्वर खुशि छन!" उनर जाणक बाद ग्वावोंल भौत खुशि हबेर कौ, "हिटो, हम बैतलहम जैबेर उ भौ कै देखनू!" तब उनुल बैतलहम ऐबेर यूसुफ, मरियम और उ भौ कै ढुट मिं धरी देखौ, जस स्वर्गदूतल उनुकै बताछी। और उनुल भौक इज-बौज्यू कै बता कि स्वर्गदूतल यैक बारि मिं हमुकै के-के बताछी।

यैक बाद वांबे लौटिबेर उं सबों कै बतूण लागीं कि यां के है रौ। जनुल लै यौ सब सुणौ, उं भौतै दंग रै गयाय।

## परमेश्वरक वैदक पुर हुण

(लुका २:२१-३३)

जब यौ भौ कै आठ दिन हई, उदिन यहूदियोंक रीतीक अनुसार उनर खतना हो। उ दिन यूसुफ और मरियमल उनर नाम यीशु धरौ। यौ नाम परमेश्वरल उ बखत मरियम कै आपण दूतक जरियल बताछी, जब मरियम अड-भारि नि छी।

यैक थ्वाड़ बखत बाद मरियम और यूसुफ परमेश्वरक नीमक अनुसार इस्रायलियोंक राजधानी यरुशलेम मिं भेट चढूणक लिजी गई, जस परमेश्वरल कै राँखछी कि हरेक स्यैणि जब वीक नॉनतैन ह्वल, तब उं यां ऐबेर म्यर लिजी भेट चढाओ। और वां परमेश्वरक भवन मिं शिमयौन नामक एक मैस छी जधै परमेश्वरल वैद करि राँखछी कि जब तलक तु आपण आँखोंल मैसोंक मुक्तिदाता कै नि देखि ल्यलै, तब तलक तु नि मरलै। जब यूसुफ और मरियम परमेश्वरक भवन मिं छी, तब शिमयौन लै परमेश्वरक मंशाल

वां आ, और परमेश्वरल शिमयौन कै बता, "यौ वी छु!" तब शिमयौनल उ भौ कै आपण काखि मिं थामिबेर परमेश्वर कै धन्यवाद दिबेर उनेर महिमा करी। वील कौ, "मील आपण आँखोल मैसों कै छुडणिवाल कै देखि है, आँब मी शांतिल मरि सकनू।" तब वील यौ लै कौ, "यौ भौ इस्रायलियोंक लिजी गर्बक कारण और अन्य जातियोंक लिजी उज्याव हवल। लेकिन मैस यैक खिलाफ लै ठाँड़ हवाल।" यैक बाद वील भौ कै आशिर्वाद दिबेर वीक इज कै दी दे।

और मरियम और यूसुफ यौ सब बातों कै सुणिबेर दंग रै गयाय।

## जोतिशियोंक उण

(मती २:१-१२)

यैक थ्वाड़ बखत बाद यरुशलेम मिं पूरब देश बे जोतिशी यैक लिजी आई किलैकि उनुल एक खाश किसमक तौर अगाश मिं देखछी। जब उनुल यैक बारि मिं ढून-खोज करी, तब उनुकै पत्त चलौ कि इस्रायल मिं एक खाश रॉजक जनम है रौ। तब उं उकै देखणक लिजी यरुशलेम गई। और वां जैबेर उनुल मैसों धैं पुछौ, "उ भौ कां छु, जो पैद है रौ और यहूदियोंक रॉज छु? हम उनुकै पैलाग करणक लिजी यां ऐ रयूं।"

उ बखत इस्रायलक रॉज हैरोदेस छी। जब वील उ जोतिशियोंक बारि मिं सुणौ, तब वील कौ, "उं को रॉजक बात करणई? यांक रॉज तो मी छूं! और हमर घर मिं क्वे च्यलक जनम नि है रौय।" फिर वील यहूदी धर्म गुरुओं कै बुलैबेर पुछौ, "हमर धर्म-शास्त्रक अनुसार यहूदियोंक सबों है तुल रॉजक जनम कां हुणिवाल छी?" उनुल बता, "बैतलहम मिं, किलैकि परमेश्वरल

यौ कौछी, "ओ यहूदा प्रदेशक बैतलहम, तु एक नॉन गौ हबेर लै यहूदाक खाश नगरों मिंबे एक छै। किलैकि तुमिंबे एक नेता पैद हवल, जो मेरि जनता इस्रायलक ग्वाव बणल।"

तब रॉजल उं जोतिशियों कै बुलैबेर उनुधैं उ तौरक बारि मिं सब-कुछ पुछौ, और उनुधैं कौ, "तुम बैतलहम नगर जैबेर



तौरक पछिन बे हिटणी जोतिशी

यौ बातक पत्त करो, और जब तुमुकैं उ मिलि जॉल, मिक्कैं लै बताया। तब मी लै जैबेर उकैं पैलाग करि सकुंल।"

यौ सुणिबेर जोतिशी जानै रई और बाँट मिं उनुल दुबार उ खाश तॉर देखौ, जकैं देखिबेर उं फिर भौत खुशि हई। और बैतलहम मिं उं उ घर मिं पुर्जी, जां यीशु छी। तब उनुल भितेर जैबेर यीशु कैं पैलाग करौ और उनुकैं सुन, धूप और गन्धरस दे। उ रात परमेश्वरल उनुकैं बता, "तुम वापिस हैरोदेस रॉजक पास नि जाया, किलैकि उ यौ भौ कैं मारण चां।" यौ सुणिबेर उं दुसर बाँटक बाँट वापिस लौट ग्याय।

## यीशुक बचण

(मती २:१३-२३, लुका २:४०)

जब जोतिशी वापिस न्है ग्याय, तब परमेश्वरक दूतल स्वीण मिं यूसुफ कैं बता, "भौ और आपणि स्यैणि कैं लिबेर मिस्र देश न्है जा। और जब तलक मी नि बतूल, तब तलक वैं रये। किलैकि हैरोदेस यौ भौ कैं मारणक लिजी चाणौ।" तब यूसुफ रातै मिं उ द्विनो कैं लिबेर मिस्र देश जानै रौ, और वां तब तलक रौ जब तलक हैरोदेस नि मर गोय।

दुसर तरफ जब हैरोदेसल देखौ कि जोतिशियोल म्यर दगाड़ चल्लाकी करी, तब उ रीशल लाल-पिडव है गोय। वील जोतिशियोंक बताई बखतक हिसाबल द्नी साल है नॉन च्यलों कैं बैतलहम और वीक ऑश-पासक गौनों मिं रुणी सबों कैं मारणक हुकुम दिबेर मरवै दे। इसिक उ पुर गौं शोक मिं डुब ग्याय।

यैक थ्वाड़ बखत बाद परमेश्वरक दूतल यूसुफ धैं स्वीण मिं कौ, "तु आपण स्यैणि और भौ कैं लिबेर इस्रायल देश वापिस जा, किलैकि हैरोदेस रॉज मरि गो।" तब यूसुफ मरियम और भौ कैं लिबेर इस्रायल देश मिं आ, और नासरत नगर मिं रुण लागौ।

और यीशु मिं परमेश्वरकि बुद्धि और आशीश बढ्नै रै।

## यहूना मैसों कैं बतू कि मुक्तिदाता उणिवाँल छु

(मरकुस १:४-११, मती ३:१३-१७)

यीशुक जवान हुणक बाद आपण परमेश्वरक काम शुरु करण हबेर पैली, यहूना नामक एक मैस प्रचार करण लागौ। वील कौ, "अधर्मक बाँट कैं छोड़िबेर आपण कैं धर्मक बाँट मिं ल्युणक लिजी मन फिराओ और

पाणिक बपतिस्मा लिबेर शुद्ध होवो!" सॉर यहूदा प्रदेश और सबै यरुशलेम मिं रुणिवाँल मैस यहूनाक पास उण भैटीं, और वीक बात सुणिबेर भौतै मैसोंल दुःखी हबेर कौ कि हम पापि छूं, और उनुल यहूनाक हातल यर्दनक गाड़ मिं पाणिक बपतिस्मा लिबेर दिखा कि हम मन फिराव करनू।

यहूना रेगिस्तान मिं रैबेर ऊंटक बाओंक बिल्कुल साद और झरझर लुकुड़ पेरछी। उ खॉणक लिजी जंडवक मौ और पिटडों कै खांछी।

वील कौ, "म्यर बाद एक दुसर मैस उणी छु, और उं मी हबेर इतुक जादे ठुल छन कि मी यौ लायक लै न्हैतियूं कि उनर ज्वतक ताँण कै झुकिबेर खोल सकूं। मील तो तुमुकै पाणिक बपतिस्माल शुद्ध करौ पर उं तुमुकै परमेश्वरक पवित्र-आत्माल शुद्ध करॉल!"

उ बखत यीशु लै यहूनाक हातल बपतिस्मा लिणक लिजी गाड़क किनॉर मिं पुर्जी। यहूनाल यौ कैबेर उनुकै रोकण चा, "मिकै तो तुमर हातल बपतिस्मा लिणकि जरूवत छु, और तुम म्यर पास ऐ राछा?" लेकिन यीशुल उनुकै जवाब दे, "ऐल यस्सै हुण दियो, किलैकि यै परमेश्वरकि मंशा छु।" यौ सुणिबेर यहूनाल यीशुक बात मानि ले। जब यीशु पाणि बे भ्यार निकलीं, उ बखतै उनर लिजी स्वर्ग खुलि गोय और उनुल परमेश्वरक आत्मा कै कबुतरक चारि आपुं मिं उतरण देखौ। और स्वर्ग बे यौ अवाज सुणाई दे, "यौ म्यर लाड़िल च्यल छु, यकै देखिबेर मी भौतै खुशि छूं!"



पाणिक बपतिस्मा लिणक बाद यीशु मिं पवित्र आत्मा उतरणै

## यहूनाक मौत

(मरकुस ६:१७-२६)

उ बखत हैरोदेस रॉजक च्यल हैरोदेस अंतिपस वांक राजपाल छी। उ आपण भैकि घरवालि हेरोदिया कै आपण घर ल्याछी। यैक लिजी यहूनाल उधै कौ, "जब कि तुमर भै ज्यून छु, तुम वीक घरवालि कै किलै धरणाछा? तुमुकै यस नि करन चैन।" यैक लिजी राजपालकि यौ प्रेमिका यहूना कै देखिबेर भौत नफरत करण भै जै और उ मौककि तलाश मिं रुं कि कसिक

उकैँ मरवायी जाओ। यौ बात सुणिबेर राजपाल धर्म-संकट मिं पड़ि गोय और वील यहूना कैँ थाँण मिं बन्द करि दे, जां उकैँ क्वे ठेस नि पुजै सको। किलैकि उ उकैँ एक पवित्र और धार्मिक मैस समझछी और यैक लिजी वी देखि डरछी। और उ वीकि बातों कैँ भली कैबेर सुणछी।

यैक बाद राजपालक जनम दिन मिं वीक सब खाश-खाश आदिम, दरबारी और सेनापती ऐ राछी किलैकि उनुकैँ राजपालल न्यूत दी राँखछी। उदिनै हेरोदिया कैँ एक बढ़िया मौक मिलौ और वील आपणि चेलि कैँ नाच करणक लिजी महल मिं लगा। उ चेलिल इतुक भल नाच दिखा कि उकैँ देखिबेर राजपाल और सब पौण खुशि हई। तब राजपालल कसम खैबेर कौ, "तु जे लै मांगलि, मी द्यूल, उ चाहे म्यर आँद राज किलै नि हो!"

तब चेलि आपणि इजक पास ऐ और पुछौ, "इजा, राजपाल यस कूणौ, मी के मांगनू?" तब इजल कौ, "चेली, तु यहूनाक मुनइ कैँ काटिबेर मांगियै।" तब चेलिल भितेर जैबेर राजपाल धैँ कौ, "मिकैँ यहूनाक गव काटिबेर मुनइ एक थाई मिं दी दियो!"

यौ सुणिबेर राजपाल भौत उदास हौ, पर आपण कसम और पौणोंकि शर्मल मजबूर हबेर वील उभतै यहूनाक गव काँटणक लिजी एक सिपै कैँ भैजौ और वील कैदखाण मिं वीक मुनइ काटिबेर एक थाई मिं धरी। तब राजपालल उकैँ चेलि कैँ दिवै दे और चेलिल आपण इज कैँ दी दे।

यैक बाद जब यहूनाक शिष्यों कैँ यौ बातक बारि मिं पत्त चलौ, उ ऐबेर वीक लाश कैँ ली गेई और उकैँ दफनै दे।

## यीशु परीक्षा मिं फेल नि हय

(मरकुस १:१२-१५)

यीशुक पाणिक बपतिस्मा लिणक बाद परमेश्वरकि पवित्र आत्मा ल उनुकैँ रेगिस्तान हुं जाणक लिजी कौ। उं चालीस दिन तलक वां रई। और वां शैतानल हर प्रकारल ललचैबेर उनर इम्तिहान ले, कि यीशु परमेश्वरक सामण पाप मिं गिर जाओ। लेकिन आखिर मिं शैतान सफल नि है सक। और तब चालीस दिनोंक बाद स्वर्गदूतोंल ऐबेर यीशुकि सेवा-टहल करी।

यैक बाद यीशु गलील प्रदेश मिं गेई और परमेश्वरक भलि खबर कैँ प्रचार करण लागीं। उनुल मैसों धैँ कौ, "परमेश्वरक राज्यक बखत नजिक ऐ गो। अधर्मक बाँट छोड़िबेर भलि खबर मिं विश्वास धरिबेर हिटो!"

## यीशु चार मछवारों कै शिष्य बणूणई

(मरकुस १:१६-२०)

एक दिन यीशु गलीलक समुद्रक किनार बे जाणाछी। तब उनुल शिमोन और अन्द्रियास नामक द्वी भैनों कै देखौ जो समुद्र मिं जाव खितणाछी किलैकि उं मछवार छी। यीशुल उनुकै बुलैबेर कौ, "तुम म्यर दगाड़ आओ! जस तुम माँछों कै जाँम करछा, उस्सै मी तुमुकै मैसों कै जाँम करणी बणूल, जैल मैस मिँकै जाणॉल और उं मी मिं भरौस करॉल।" तब उं एकदम आपण काम कै छोड़िबेर यीशुक दगाड़ ऐ ग्याय और उनार शिष्य बणि ग्याय।

थ्वाड़ अधिल जैबेर यीशुल फिर दुसॉर मैसों कै देखौ। उनुमिं द्वी भै याकूब और यहूना लै छी। उं नाव मिं भैबेर आपण जावों कै ठिक करणाछी। यीशुल उनुकै बुला और उं आपण बौज्यू कै मजदूरोंक दगाड़ नाव मिं छोड़िबेर यीशुक दगाड़ जानै रई।

## यीशु मैस मिंबे भूत निकालणई

(मरकुस १:२१-२८)

अरामक दिन यीशु कफरनहूम नगर मिं ऐबेर सभा-घर मिं गई, और वां परमेश्वरक बातोंक बारि मिं परचार करण लागीं। मैस यीशुक उपदेश सुणिबेर दंग रै ग्याय किलैकि उं दुसॉर धर्म गुरुओंक चारि नै, पर आपण अधिकारल उनुकै उपदेश दिणाछी।

उ बखत उनर सभा-घर मिं एक मैस यस छी जो भूतोंक बश मिं छी। वील चिल्लाट पाड़िबेर कौ, "ओ नासरत मिं रुणी यीशु, तुमुकै हमुधैं के काम? के तुम हमुकै बरबाद करणक लिजी ऐ राछा? मी जाणनू कि तुम परमेश्वरक भेजी पवित्र मैस छा!"

लेकिन यीशुल उकै डाटिबेर कौ, "चुप रौ! और यौ मैस मिंबे भ्यार निकलि जा।" तब भूत उ मैस कै मरोड़िबेर जोरक चिल्लाट पाड़नै उमिंबे भ्यार जानै रौ।

यौ देखिबेर सबै मैस भौतै दंग रै ग्याय और एक-दुसर धैं पुछण लागीं, "यौ के बात छु? यौ तो अधिकारल नई किसमक उपदेश दिणौ। उ भूतों कै लै हुकुम दी और उं वीक हुकुम कै माननी!" और इसिक यीशुक चर्चा जल्दी पुर गलील प्रदेशक वाण-क्वाणों मिं फैलि गई।

## यीशु शिमोनकि साँस कै भल करणई

(मरकुस १:२६-३६)

यीशु सभा-घर बे भ्यार एबेर शिमोन और अन्द्रियासक घर मिं गई। तब मैसौल उनुकें बता कि शिमोनकि साँस कै भौतै जर ऐ रौ। यीशु वीक पास गई। और उनुल वीक हात पकड़िबेर उकें उठा। और उ बखतै वीक जर ठिक है गोय और उ यीशुकि सेवा करण लागी।

फिर ब्याव बखत मैस भौतै बिमारों और भूत लागी मैसों कै यीशुक सामण ल्याई। नगरक मैस द्वार मिं जाँम है ग्याय। यीशुल भौतै किसमाँक बिमारियोंल पीड़ित मैसों कै भल करौ और भौत मैसों मिंबे भूतों कै निकालौ। यीशु भूतों कै बुलाण नि दिंछी किलैकि भूत जाणछी कि यीशु को छन।<sup>1</sup>

यीशु रात्ति अन्यारै मिं उठीं और गौं हबेर भ्यार एकांत जाँग मिं जैबेर प्रार्थना करण भैटीं। यैक थ्वाड़ देर बाद शिमोन और वीक दगडु यीशु कै चाणक लिजी गई। जब उ मिलि ग्याय, तब उनुल कौ, "तुम कां छिया, सब मैस तुमुकें चाणई!"

तब यीशुल उनुधै कौ, "हिटो, आँश-पासक गौनों मिं जानू। मील वां लै परमेश्वरक बचन बतूण छु, किलैकि मी यैकै लिजी संसार मिं ऐ रयं।" और उ वांबे गलीलक गौनों मिं गई और यीशु सभा-घरों मिं परमेश्वरक बचन बतूण लागीं और उनुल भूतों कै लै निकालौ।



यीशु बिमारों कै भल करणई

## यीशु एक कोड़ी कै भल करणई

(मरकुस १:४०-४५)

फिर एक दिन यीशुक पास एक कोड़ी मैस आ। उ उनर खुटॉन मिं पड़िबेर विनती करण लागौ, "अगर तुम चाला, तब मी भल है जूँल!" तब यीशुल दया

<sup>1</sup> यीशु किलै नि चाँछी कि मैसों कै पत्त चलो कि उ को छन? जो मुक्तिदाताक इंतजार मैस करणाछी, उ यीशु छन। लेकिन यीशु ऐल तलक यौ नि चाँछी कि मैसों कै यौ बात पत्त चलो। यौ यैक लिजी हौ किलैकि मैस मुक्तिदाताक काम गलत समझणाछी। उ सोचणाछी कि मुक्तिदाता उनुकें रोमी गुलामी बे छुड़ाल, जब कि यीशु उनुकें मौत और पापक सजा बे मुक्ति दिणिवाल छी। परमेश्वरक मंशा मैसक मंशा हबेर भौत बढिबेर छु!

करिबेर उमिं आपण हात लगैबेर कौ, "होई, मी चानू, तु भल है जा।" और वीक कोड़ उ बखतै साफ है गोय और उ बिल्कुल ठिक है गोय।

यीशुल उकै भली कैबेर समझैबेर कौ, "सुण, तु आपण ठिक हुणक बारि मिं कैकै के झन बताये, लेकिन सिद्द जैबेर याजक कै आपुं कै दिखाये और मोशेशक नीमक अनुसार भेट चढ़ाए, जो सब मैसोंक लिजी सबूत हवल कि तु ठिक है गोछै।"

पर वील यीशुक कौय नि मानिबेर मैसों कै आपण ठिक हुणक बारि मिं बतूण भैटौ। जैक वील यीशु नगरों मिं नी जै सक, किलैकि वां लै भौतै भीड़ जॉम है गोछी। और उं एकांत जॉग मिं रुण भैटीं। फिर लै उनर पास गौं-गौं बटी मैस उणाछी।

## यीशु बाइपड़ी मैस कै भल करणई

(मरकुस २:१-१२)

यैक थ्वाड़ दिनक बाद यीशु कफरनहूम नगर मिं लौटौ। जब यौ खबर फैल गई कि उं घरै मिं छन। तब इतुक मैस जॉम है ग्याय कि द्वारक सामण लै जॉग नि मिलि। और यीशु उनुकै परमेश्वरक बात सुणूणाछी।

उ बखत चार मैस एक बाइपड़ी आदिम कै खाट मिं धरिबेर यीशुक सामण ल्युणाछी। लेकिन भीड़क कारणल उं उकै यीशुक सामण नि लै सक। यैक लिजी उनुल पाँख मिं जैबेर पाँख खोल दे और उ बाँट उ मैस कै यीशुक सामण उतारिबेर धरि दे। यीशुल उं मैसोंक विश्वास देखिबेर बाइपड़ी मैस धै कौ, "च्यला, त्यर पाप माफ है गई।"

वां थ्वाड़ धर्म गुरु बैठि राछी, जो यौ सुणिबेर सोचण लागीं कि यौ मैस यस किलै कूणौ? परमेश्वरक अलावा क्वे लै दुसर पाप माफ नि कर सकन! यौ तो परमेश्वरक बुराइ करणौ!

यीशुल आपण मन मिं जाणि ले कि उं के सोचणई। उनुल धर्म गुरुओं धै कौ, "तुम यस किलै सोचणाछा? जादे सितुल के छु, बाइपड़ी मैस धै यस कूण कि त्यर पाप माफ है गई, या फिर यस कूण कि उठ, आपण खाट कै उठैबेर हित? मी तुमुकै दिखै सकनू कि मी जो परमेश्वरक तरफ बे ऐ रयूं, मिंकै धरति मिं पाप माफ करणक अधिकार लै छु।" यीशुल बाइपड़ी मैस धै कौ, "मी तुधै कूनू, उठ, आपण खाट कै उठैबेर घर जा!"

यौ सुणिबेर बाइपड़ी मैस झट्ट उठौ, और आपण खाट उठैबेर सबनक चान-चाने जानै रौ। और यौ देखिबेर सबै दंग रै ग्याय, और उनुल परमेश्वरक बढ़ाई करी कि हमुल यस कभै नि द्यख।

## यीशु एक चुंगी लिणी कै शिष्य बणूणई

(मरकुस २:१३-१७)

कफरनहूम बे भ्यार ऐबेर यीशु गलीलक समुद्रक किनार मिं जाणाछी। फिर सारि भीड़ उनर पछिल ऐ गेई और यीशुल उनुकै परमेश्वरक बचन बता।

हिटन-हिटनै यीशुल लेवी नामक एक मैस कै देखौ जो चुंगी घर मिं बैठिबेर रोमी सरकारक लिजी चुंगी जॉम करणौछी। यीशुल उकै बुलैबेर कौ, "म्यर दगाड़ आ।" और उ ठाँड़ उठौ और उनर पछिल जानै रौ, और उनर शिष्य बणि गेय।<sup>2</sup>

यैक बाद यीशु आपण शिष्योंक दगाड़ वीक घर मिं खाँण खाणाछी। चुंगी लिणी और दुसॉर मैस लै जो धर्म गुरुओंक नजर मिं पापी मानी जाँछी, उं लै उनर दगाड़ छी, किलैकि भौत याँस मैस लै यीशुक दगाड़ जै राछी। थ्वाड़ धर्म गुरुओंल यौ देखिबेर कि यीशु चुंगी लिणी और दुसॉर पापियोंक दगाड़ खाँण खाणाछी, यीशुक शिष्यों धँ कौ, "तुमर गुरु पापियोंक दगाड़ खाँण किलै खाँनी? यौ भलि बात न्है।" यीशुल यस सुणिबेर उनुधँ कौ, "जसिक जो बिमार न्हैतिन उनुकै डाक्टरक के जरूवत न्है, लेकिन जो बिमार छन उनुकै डाक्टरक जरूवत छु, इसिकै मी धर्मियों कै नै, बल्किन पापियों कै बचूणक लिजी ऐ रयू।"

## मैस यीशु धँ बर्तक बारि मिं पुछणई

(मरकुस २:१८-२२)

एक दिन यहूनाक शिष्योंल और धर्म गुरुओंल बर्त धरि राँखछी, लेकिन यीशुक शिष्योंल बर्त नि धर। यौ देखिबेर थ्वाड़ मैस यीशुक पास ऐबेर कूण लागीं, "यहूनाक शिष्य और धर्म गुरु बर्त करनी, पर तुमार शिष्य बर्त किलै नि करन?" यीशुल जवाब दे, "जब तलक बर बरातियोंक दगाड़ छु, के बराती बर्त करि सकनी? बिल्कुल नी करि सकन किलैकि उं खुशि छन। पर यस दिन आल जब कि बर बरातियों बे अलग करी जाँल। उ दिन उं बर्त कराँल किलैकि उं दुःखी ह्वाल।"

यीशु यैक बारि मिं उधारण दिबेर समझूनी, "पुराँण कपड मिं नई कपडक टाँल नि हालन किलैकि नई कपड ध्वेणक बाद छ्वट है जां, जैल पुराँण

<sup>2</sup> चुंगी जॉम करणी मैस रोमी सरकारक लिजी चुंगी जॉम करछी, और उं सरकारक जरियल तय करी रकम है जादे रकम मैसों धँ जोर दिबेर जॉम करछी। यैक लिजी मैस उनुकै देखिबेर नफरत करछी।

कण्ड और जादे फाटि जां। और क्वे लै मैस नई अंगूरक रस कै पुराण चमड़क थैल मिं नी धरन, किलैक अंगूरक रस जब बणणक लिजी बढूं, तब थैल कै फाड़ि द्युं और अंगूरक रस और थैल द्विवै बेकार है जानै। यैक लिजी हम नई अंगूरक रस कै नई थैल मिं धरनू।" <sup>3</sup>

## यीशु अरामक दिनक लै प्रभु छन

(मरकुस २:२३-२८, ३:१-६)

जब यीशु और उनार शिष्य अरामक दिन ग्योंक गाँड़ोंक बाँट हिटणाछी, तब शिष्य ग्योंक बालड़ों कै टोड़िबेर खाँण भैटीं। यौ देखिबेर धर्म गुरुओंल यीशु कै डाँटिबेर कौ, "तुमार शिष्य फसल काँटणई, जो अरामक दिन करण मना छु!" लेकिन यीशुल उनुधै कौ, "अरामक दिन मैसक लिजी बणै राँखौ, न कि मैस अरामक दिनक लिजी। मी जो परमेश्वरक तरफ बेटि ऐ रयूं, मी अरामक दिनक लै प्रभु छूं।"

यैक बाद अरामक दिन यीशु सभा-घर मिं गई, जां एक मैस छी जैक हात मिं बाइपड़ी छी। थवाड़ मैस यीशु कै चै राछी कि उं बाइपड़ी हातवाल मैस कै अरामक दिन ठिक करुं या नि करन। उं उनुमिं दोष लगूण चाणाछी किलैकि उं कैकै ठिक करण लै काम समझछी, और अरामक दिन काम करण मना छी। यीशुल बाइपड़ी हातवाल मैस धै कौ, "उठ, और बीच मिं ठाँड़ है जा।" जस यीशुल कौ, वील उस्सै करौ। फिर यीशुल मैसों धै पुछौ, "अरामक दिन मिं नीमक अनुसार के ठिक छु, कैकै लिजी भल करण या नक करण, कैकणी बचूण या मारण?" और उं शरमक मारी चुप रई।

तब यीशु कै यौ देखिबेर भौतै दुःख हौ और उनुकै रीश लै ऐ गई, किलैकि मैस नि चाँछी कि बाइपड़ी हातवाल मैस ठिक है जाओ। और यीशुल उ मैस धै कौ, "आपण हात सिद्द कर।" जब वील आपण हात सिद्द करणकि कोशिश करी, तब वीक हात बिल्कुल ठिक गय।

उ बखत बे फरीसी दलक धर्म गुरु यीशु कै मारण चाँछी और भैर जैबेर राजपाल हैरोदेसक पालटिक दगाड़ मिलिबेर यीशु कै मारणक लिजी चाल-चलण भै ग्याय। <sup>4</sup>

<sup>3</sup> यीशुक कणक मतलब यौ छु कि जो उपदेश मी दिनु, उ पुराण रीती-रिवाजोंक दगाड़ मेल नि खाँण किलैकि उ बिल्कुल नई छु।

<sup>4</sup> हैरोदेस गलील प्रदेश मिं रोमी सरकारक राजपाल छी। हैरोदेसक पालटि रोमी सरकार कै मधत दिँछी, लेकिन फरीसी रोमी सरकारक खिलाफ छी। हैरोदेसक पालटिक फरीसियोंक दगाड़ यै हबेर पैली आपस मिं क्वे किसमक मेल-मिलाप नि छी।

## मैंस चारों तरफ बे यीशुक पास उणई

(मरकुस ३:७-१६)

फिर यीशु और उनार शिष्य गलीलक समुद्रक तरफ गई। उनर पछिल एक ठुली भीड़ ऐ गई, जैमिं यौ देशोक चारों दिशाक मैंस छी, किलैकि यौ खबर फैल गई कि यीशु बिमारों कै ठिक करनी। यैक लिजी बिमार मैंस एक-दुसर कै पछियूनै यीशुक पास उणाछी, कि उं यीशु कै छुबेर भल है सको। भीड़ल दबण है बचणक लिजी यीशुल आपण शिष्यों धै कौ, "एक नाव तैय्यार करो, जमिं मी बैठ सकूं।"

और भीड़ मिं यॉस मैंस लै छी जो भूतोंक बश मिं छी, और जब उनुल यीशु कै देखौ, तब उं डरक मारी उनर खुटॉन मिं छुटण लागीं और जोर-जोरल कूण लागीं, "तुम परमेश्वरक च्यल छा!" लेकिन यीशुल उनुकै जोर दिबेर कौ, "मैंसों कै झन बताया कि मी को छूं।"

फिर यीशु पहाड़ मिं गई और जनुकै चा उनुकै आपण पास बुला। और उनुल उनुमिं बे बार शिष्य तैय्यार करी कि उं उनर दगाड़ रओ और उं उनुकै परचार करणक लिजी भेजो, और उनुल उनुकै भूतों कै निकालणक अधिकार लै दे।

उं बार शिष्यों मिं यौ छन - शिमोन जैक नाम यीशुल पतरस धरौ, वीक भै अन्द्रियास, जबदीक च्याल याकूब और यहूना, फिलिप्पुस, बरतोलोमी, लेवी चुंगी लिणी जैक दुसर नाम मती छी, थोमा, हलफईक च्यल याकूब, तदै, शिमोन जो रोमी सरकारक बिरोधी दलक एक सदस्य छी, और युदस इस्करोती जो बाद मिं यीशु कै पकड़ुणिवॉल ह्वल।

## यीशुल शैतान कै हरै है

(मरकुस ३:२०-३५)

यैक बाद यीशु कफरनहूम नगरक जो घर मिं रुणाछी वां आई और वीक चारों तरफ ठुली-ठुली भीड़ जाँम है पड़ी, जैल उनुकै खाँण-खाँणक मौक लै नि मिलि सक। यौ सब सुणिबेर यीशुक रिशतदार यौ कैबेर कि उ पगली गो वां आई, यौ सोचिबेर कि हम उकै घर ल्युनू।

उ बखतै यरुशलेम बटी आई धर्म गुरुओल यस कौ, "यैमिं सबों हबेर ठुल शैतान छु और यौ वीकि ताकतल भूतों कै निकालुं!" यौ सुणिबेर यीशुल धर्म गुरुओं कै आपण पास बुलैबेर कौ, "शैतान आपण कै कसिकै खेदि सकुं? अगर क्वे देश मिं भितेर-भितेरै फूट पड़ि जालि तब उ देशक एक दिन नांश

है जॉल। जसिक घर मिं फूट पड़न मिं उ परिवारक सत्यानाश है जां, उसिकै अगर शैतान आपण दगाड़ विद्रोह करो, तब उं सबै एक दगाड़ नांश है जॉल।

क्वे लै आदिम कस्सै लै ताकतबर मैसक घर कै तब तलक नि लुटि सकुन जब तलक कि उ घरक मालिक कै पकड़िबेर बादि नि दियो। तब जैबेर उ वीक घर कै लुटि सकुं।" <sup>5</sup> यीशुल फिर कौ, "मी तुमुधैं सांचि कूं, क्वे लै मैस कतुकै पाप या परमेश्वरक बुराइ करल तो उनुकै माफि मिलि जालि। लेकिन अगर तुम कूंछा कि मी यौ काम परमेश्वरक पवित्र आत्माक जरियल नै लेकिन शैतानक जरियल करणयूं, तुम परमेश्वरक पवित्र आत्माकि बुराइ करछा, और यैक माफि तुमुकै कभै नि मिलो।"

उ बखतै यीशुक इज और भै-बैणियोंल भ्यार बे उनुकै बुलूणक लिजी क्वे मैस भितेर लगा, किलैकि यीशुक चारों तरफ भीड़ छी। वील यीशु धैं कौ, "देखो, तुमेरि इज और तुमार भै-बैणी भ्यार छन और उं तुमुकै बुलूणई।"

यीशुल जबाब दे, "को छु मेरि इज और को छन म्यार भै-बैणी?" फिर यीशुल आपण चारों तरफ भैटीं मैसोंक तरफ चैबेर कौ, "यौ छन मेरि इज और म्यार भै-बैणी! जो मैस परमेश्वरक मंशा कै पुर करनी, उं सांचि मिं म्यर भै, मेरि बैणी और मेरि इज छन।"

## यीशु उपदेश दिणई

(लूका ६:२०-३८, ४१-४२)

यीशुल आपण शिष्यों कै देखिबेर कौ,

"धन्य छा तुम जो गरीब छा, किलैकि परमेश्वरक राज तुमरै छु।

धन्य छा तुम जो ऐल भूक छा, किलैकि तुम संतुष्ट करी जॉला।

धन्य छा तुम जो ऐल डाड़ मारणाछा, किलैकि तुम हसला।

धन्य छा तुम जब म्यर कारणल मैस तुमर दगाड़ नफरत करॉल, तुमर विरोध और बेईजती करॉल, और तुमुकै बदनाम करिबेर निकालि द्याल। उदिन खुशि हैया और आनंद मनाया, किलैकि यैक बदाव स्वर्ग मिं तुमुकै ठुल इनाम मिलल! उनर पुरखोंल लै परमेश्वरक सेवकोंक दगाड़ यस्सै करछी।

पर हाय तुमर लिजी जो तुम सेठ छा, किलैकि तुमुल आपण सुख-शांति पै हैली।

<sup>5</sup> यीशुक कूणक अर्थ छी कि मील शैतान कै हरैबेर बादि है और यैके वील मी भूतों कै ले निकालि सकनू।

हाय तुमर लिजी जो संतुष्ट छा, किलैकि तुम भूक रौला।

हाय तुमर लिजी जो ऐल हसणाछा, किलैकि तुम दुःखी ह्वला और डाड़ मारला।

हाय तुमर लिजी जब मैस तुमेरि बढ़ाई करनी, किलैकि उनर पुरखा लै झुट सेवकाँक दगाड़ यस्सै करछी।

मी तुमुधैं यस कूनू कि आपण दुश्मणोंक दगाड़ लै प्रेम करो। जो तुमर दगाड़ दुश्मणाई धरनी, उनेरि लिजी भलाइ करो।

जो तुमुकैं फिटकार दिंनी उनुकैं आशिर्वाद दियो, जो तुमर दगाड़ नक बर्ताव करनी, उनर लिजी प्रार्थना करो।

जो तुमर एक गालड़ मिं थप्पड़ मारुं, उकैं दुसर गालड़ लै दी दियो।

जो तुमर कोट लूंटुं, उकैं आपण कुर्त लै दी दियो। जो क्वे लै तुमुधैं के मांगुं, उकैं उ दियो। जो तुमर चीज छडूं, उधैं उ वापिस नि मांगो।

जस व्यवहार तुम दुसर धैं आपण लिजी चाँछा, उस्सै व्यवहार तुम उनर लिजी लै करो।

अगर तुम उनरै दगाड़ प्रेम करछा जो तुमर दगाड़ प्रेम करनी, तब यैमिं तुमर के बढ़ाई छु? किलैकि पापी, जो प्रभु कैं नि मानन, उं लै आपण प्रेम करणियोंक दगाड़ प्रेम करनी। अगर तुम उनेरि भलाइ करछा जो तुमेरि भलाइ करनी, तब यैमिं तुमेरि के बढ़ाई छु? किलैकि पापी लै यस्सै करनी। अगर तुम उनुकैं कर्ज दिँछा जनुबे वापिस पाणकि आँश धरछा, तब यैमिं तुमेरि के बढ़ाई छु? किलैकि पापि लै पापियों कैं कर्ज दिंनी कि उनुबे फिर उदुकैं वापिस पै लियो।

लेकिन तुम आपण दुश्मणोंक दगाड़ लै प्रेम करो, उनेरि भलाइ करो और वापिस पाणक आँश नि धरिबेर कर्ज दियो। तबै तुमर इनाम लै ठुल ह्वल और तुम महान परमेश्वराँक संतान बणि जॉला, किलैकि उं लै अबगुण-अलुणियों और दुष्टों मिं दया करनी।

दयालु बणो जस तुमर स्वर्गीय पिता परमेश्वर दयालु छन।

इल्जाम नि लगाओ, तब तुमुमिं लै इल्जाम नि लगाई जॉल। कैकैं खिलाफ फैसॉल नि करो, तब तुमर खिलाफ लै फैसॉल नि करी जॉल। माफ करला, तब तुमुकैं लै माफ करी जॉल।"

दूयला, तब तुमुकैं लै दी जॉल। च्याप-च्यापिबेर और पुर-पुर नांपल तुमर काखि मिं खिती जॉल, किलैकि जो नांपल तुम नाँपछा, वी नांपल तुमर लिजी लै नाँपी जॉल।"

यीशुल फिर कौ, "जब तुमुकें आपणै आँखक लट्ठक पत्त न्हैं, तब तुम आपण भैक आँखक तिनड़ कै कसिक देखछा? जब तुमुकें आपण आँखक लट्ठ नि दिखाइ दिन, तब तुम कसिक आपण भै धैं कै सकछा, "ल्या, मी त्यर आँखक तिनड़ निकालि दिंनू।" ओ कपटी, पैली आपण आँखक लट्ठ कै निकाल, तब तु आपण भैक तिनड़ कै भली कै निकाल सकलै!"

## अनाजक बीक तुलना परमेश्वरक वचनक दगाड़

(मरकुस ४:१-२०)

यैक बाद यीशु गलीलक समुद्रक किनार मिं परचार करणाछी और उनर दगाड़ इतुक ठुलि भीड़ जाँम है गई कि उनुकें परचार करणक लिजी एक नाव मिं बैठण पड़ौ। यीशुल उनुकें किस्स-किस्सों मिं भौत बातोंक बारि मिं समझा। उनुल कौ, "सुणो, एक किसान बीं ब्वेणक लिजी गो। ब्वैन-ब्वैनै थ्वाड़ बीं बाँटक किनार मिं पड़ी, और चाड़ोंल ऐबेर उनुकें खै ले। थ्वाड़ बीं पथरीली भूमी मिं पड़ी और उं माँटक कमीक कारण जल्दी जाँम गई। लेकिन तेज घामल समलन है पैलियै सुक पड़ी किलैकि उनर जाड़ गैल माँट मिं नि छी। थ्वाड़ बीं झाड़ियोंक बीच पड़ी और झाड़ियोंल उनुकें दबै दे। यैक लिजी उं फलवंत नि है सक। लेकिन थ्वाड़ बीं भलि भूमी मिं पड़ी और उं जामिबेर इतुक फलवंत हई कि क्वे तीस गुण, क्वे साठ गुण और क्वे सौ गुण फल लाई। यौ बात कै सुणो और सिख लियो।"

जब यीशु एकांत मिं छी तब उनार बार शिष्योंल उनुधैं यौ किस्सक बारि मिं पुछौ। तब यीशुल कौ, "परमेश्वरक राज्यक भेद तुमुकें दिखै राँखौ। पर जो मैस मी मिं भरौस नि करन उनर लिजी मी किस्सोंक जरियल बात करनू। जस परमेश्वरल यशायाह नबी जरियल के राँखौ, "जब उनुकें म्यर काम दिखाई जां, तब उं नि देखन और जब उनुकें मेरि बात बताई जां, उं नि सुणन। नतेरि यौं पछ्ताव करन और मी इनुकें भल करि दिंछी।"

यीशुल उनुधैं फिर कौ, "अगर तुम यौ किस्सक अर्थ नि समझना तब और किस्सोंक अर्थ कसिक समझला? फिर लै मी तुमुकें समझनू कि बीं परमेश्वरक बचन छु, और बीं ब्वैणी परमेश्वरक बचन सुणूणी छु। जस थ्वाड़ बीं बाँटक किनार मिं पड़ी और चाड़ोंल ऐबेर उनुकें खै ले, उस्सै थ्वाड़ मैस बचन सुणनी, लेकिन शैतान ऐबेर उनर मन बे बचन निकालि ली जां। और जस थ्वाड़ बीं पथरीली भूमी मिं छुटी, उस्सै थ्वाड़ मैस बचन सुणिबेर

खुशि-खुशी उकै माननी, लेकिन जड़ भली कै नि पकड़न। उं थ्वाड़ बखत तलक विश्वास करनी लेकिन दुःख मुशीबतक उण पर फेल है जानी।

फिर जस थ्वाड़ बीं झाड़निक बीच पड़ी, थ्वाड़ मैस बचन सुणनी लेकिन अधिल जैबेर उं चिन्ता और आपण धन-दौलत और जिन्दगीक ऐश अराम मिं फस जानी और उनर फल भली कै नि पाकन।

लेकिन जस थ्वाड़ बीं भलि भूमी मिं पड़ी, उस्सै थ्वाड़ मैस बचन ध्यानल सुणिबेर हमेशा आपण भितेर समाइबेर धरनी और फल ल्युंनी - क्वे तीस, क्वे साठ और क्वे सौ गुण।"

## यीशु अलग-अलग किस्स सुणूणई

(मरकुस ४:२१-३४)

फिर यीशुल उनुधैं कौ, "मैस यैक लिजी बत्ती नि जलून कि उकै चारपाईक ताव धरो या क्वे लै भानल ढक दियो, बल्किन यैक लिजी जलूनी कि उकै उंच जॉग मिं धरो जैल सॉर भितेर मिं उज्याव है जाओ। सबै जो ऐल ढकि-छोपि करि रॉखौ, उ बखत उण पर सामण आल। जो तुम ऐल नि समझण रया, बखत उण पर समझि जॉला। यकै सुणो और सिखि लियो।

तुम परमेश्वरक बात कैं जतुकै लै सुणछा, उकै ध्यानल सुणो और समझो, किलैकि अगर तुम समझणक कोशिश करला तब तुमुकैं और जादे

समझणक शक्ति दी जालि।

किलैकि जैक पास समझणक शक्ति छु, उकै आइ मिलेलि, और जैक पास न्है, उधैं बे उ लै ली ली जालि, जो वीक पास छु।"

फिर यीशुल मैसों धैं कौ, "मी तुमुकैं परमेश्वरक राज्यक बारि मिं एक दुसर किस्स सुणूणू। परमेश्वरक राज

उ मैसक चारि छु जो कि भूमी मिं बीं ब्वैं। उ रात-दिन सी-बिज रुं और दुसेरि तरफ भूमी मिं बीं जॉमनी। उ यैक बारि मिं के नि जाणन कि यौ सब कसिक हुणौ। भूमी आफी फसल पैद करुं, पैली त्वर फिर बालड़ और फिर जैबेर बालड़ मिं पक्क गुद। और तब उ मैस खेति कैं काँटण भैजां किलैकि काँटणक बखत है गो।"



यीशु नाव मिं भैबेर प्रचार करणई

फिर यीशुल कौ, "परमेश्वरक राज एक रै बीक चारि छु। जब उ धरति मिं बोई जां, तब उ सारि धरति मिं सबों हबेर नॉन बीं हुं। पर बोई जाणक बाद जब उ जांमुं, तब सबों है ठुल पौध है जां और वीक हाड-फाड इतुक ठुल है जानी कि वी मिं अगाशॉक चाड़-पथील आपण घोल बणै सको।"

यीशु यस्सै भौतै किस्सोंक जरियल मैसों कैं उनेरि समझक हिसाबल परमेश्वरक बचन सुणूछी। उ बिना किस्सोंक जरियल कैधैं के नि कूँछी पर एकांत मिं आपण शिष्यों कैं सब किस्सोंक अर्थ भली कैबेर समझै दिंछी।

## यीशुक कूण पर हाव-बयाव थॉमी गे

(मरकुस ४:३५-४१)

उ दिन ब्याव बखत जब उं समुद्रक किनॉर मिं छी, तब यीशुल आपण शिष्यों धैं कौ, "आओ, हम समुद्रक पार जानू।" और भीड़ छोड़िबेर शिष्य यीशु कैं नाव मिं ली गई। दुसेरि नाव लै उनेरि दगाड़ जानै रै।

तब समुद्र मिं एक जोरक हाव बयाव उठौ और लहर इतुक जोरल नाव मिं टकराई कि उ पाणिल भरीण भैटीं।

उ बखत यीशु नावक पछिल हिस्स मिं शिराणि लगैबेर से राछी। शिष्योंल उनुकैं उठैबेर कौ, "गुरुज्यू, हम डुबणयूं, तुमुकैं हमर के फिकर न्हैंती?" यीशुल उठिबेर हाव कैं डांटौ और समुद्र धैं कौ, "शांत है जा, थॉमी जा!" और हाव थॉमी गई।

उनुल आपण शिष्यों धैं कौ, "तुम किलै डरणाछा? के तुमुकैं आइ तलक विश्वास न्हैंती?"

शिष्यों मिं भौतै डर छै गोय और उं आपस मिं यस कूण भैटीं, "हमर समझ मिं के नि उणौय कि यौ को छन, कि हाव और समुद्र लै इनर कयूं माननी!"

## यीशु भूतोंक सेना कैं भजूणई

(मरकुस ५:१-२०)

यीशु आपण शिष्योंक दगाड़ गलीलक समुद्रक उ पार गेरासेनियो नामक इलाक मिं आई। यीशु जस्सै नाव बे भी मिं उतरीं, एक भूत लागीं मैस कब्रिस्तान बे सिद्द उनर पास आ। उ कब्रिस्तानक आंश-पास रुंछी और उकैं क्वे जंजीरोंल लै नि बादि सकछी। किलैकि उकैं बारि-बारि जंजीरोंल और बेडियोल बादछी, पर वील जंजीरों कैं टोड़ि दे और बेडियोंक टुकुड़-टुकुड़ बड़ै देई। वी पर क्वे लै काबू नि करि सकछी। उ रात दिन लगातार

कब्रिस्तान और ऑश-पासक डॉनों में चिल्लाट पाइछी और ढुडल आपुं केँ हांडि-हांडिबेर घैल है रौछी। उ यीशु केँ देखिबेर दूर बटी दौड़ने आ। तब यीशुल उ भूत धैँ कौ, "हे भूत, तु यकेँ छोडिबेर न्हे जा!" उ मैसल वीक खुटों में गिरबेर जोरल कौ, "हे यीशु, सबों है ठुल परमेश्वरक पुत्र, म्यर दगाड़ तुमर के बुत, तुमुकेँ परमेश्वरक कसम छु कि तुम हमुकेँ परेशान झन करिया!" यीशुल उधैँ पुछौ, "त्यर नाम के छु?" उ भूतल जबाब दे, "हम भौत छिन, हमर नाम सेना छु।" और उ यीशु धैँ विनती करण भैटीं कि हमुकेँ यौ प्रदेश बे भ्यार झन खेडिया।

उ बखत वां डॉन में सुअरोंक एक ठुलौ झुंड चरणौछी। भूतोंल यौ कैबेर यीशु धैँ विनती करी कि हमुकेँ उ सुअरों में भेजि दियो। यीशुल उनुकेँ यौ हुकुम दी दे। तब सबे भूत उ मैसक भितेर बे निकलिबेर सुअरोंक भितेर गई, और उ सुअरोंक झुंड हुलार में दौड़बेर आ और समुद्र में डुबिबेर मरि गोय। यौ लगभग द्नी हजार सुअर छी।

तब सुअरोंक ग्वाव भाजिबेर नगर और गौनों में गई और यौ खबर फैलै दे। और सब मैस यौ देखणक लिजी आई कि के बात छु। उ यीशुक पास आई और यौ देखिबेर भौतै डरि पड़ीं कि उ भूत लागी मैस बिल्कुल ठिक-ठाक छु और लुकुड पैरिबेर भली के बैठि रौ। जनुल यौ सब आपण सामण हुण देखौ उनुल औरों केँ लै यौ बता कि भूत लागी मैसक दगाड़ के हौ और सुअरों पर के बिती।

तब वां रुणिवॉल मैस यीशु धैँ विनती करण भैटीं कि तुम हमर प्रदेश बे न्हे जाओ। (यौ सोचिबेर, कि अगर उ यीशु यां रौल, हमर के और नुकसान हवल!)

जब यीशु नाव में चढ़न लागीं, तब उ मैसल जैमिं पैली भूत छी, विनती करी, "मिकेँ आपण दगाड़ उण दियो!" लेकिन यीशुल उधैँ कौ, "आपण घरहुं जा और उनुकेँ बता कि परमेश्वरल त्यर लिजी कतुक भल करौ और कस ढडल तु में किरपा करी।"

यौ सुणिबेर उ जानै रौ और सॉर इलॉक में यौ बतूण भैटौ कि यीशुल वीक लिजी कतुक ठुल काम करौ। यौ सुणिबेर सब मैस दंग रै ग्याय।

## एक मरी चेलिक ज्यून हुण

(मरकुस ५:२१-४३)

यैक बाद जब यीशु नावल समुद्रक पार दुबार पुजौ, तब उनर पास एक ठुलि भीड़ जॉम है गई। इतुक में सभा-घरक एक प्रधान आ जैक नाम याईर

छी। उ यीशु कै देखिबेर उनर खुटॉन मिं पड़ि गोय, और यौ कैबेर विनती करण भैटौ, "मेरि बार बरसक चेलि मरणी है रे! दया करिबेर म्यर दगाड़ हिट दियो, और उमिं हात धरि दियो कि उ भलि है जाओ और ज्यून रे सको!" और यीशु वीक दगाड़ जानै रौ।

उनर दगाड़ इतुक ठुलि भीड़ छी कि मैस उनर माथि मिं छुटणाछी। और वां एक स्यैणि लै छी जकै बार साल बे खून पड़णक रोग लागि रौछी। उ इलाजक लिजी कतुक किसमॉक वैद्योंक पास लै गे पर के फरक नि हय। यैक अलावा वीक पुर धन दौलत लै बर्बाद है गोय। वील यीशुक बारि मिं सुण रॉखछी कि उं बिमारों कै भल करनी। यैक लिजी उ लै सोचछी कि अगर मी उनर लुकुड़ कै लै छुड़ ल्यूल, तब भली है जूल। यैक लिजी वील भीड़क बीच मिं चुपचाप ऐबेर यीशुक लुकुड़ छुड़ ले। और उ बखतै बे वीक खून गिरण बन्द है गोय और वील चिता कि मी यौ रोग है भलि है गोयुं।

यीशुल उ बखतै जाण ले कि म्यर भितेर बे शक्ति निकलि रे। उनुल रुकिबेर कौ, "मिकै कैल छुडौ?" उनार शिष्योंल कौ, "गुरुज्यू, तुम खुद देखणाछा कि भीड़ चारों तरफ बे तुमर माथि मिं उमड़ रे। तब लै तुम पुछणाछा कि मिकै कैल छुडौ!" लेकिन यैक पत्त करणक लिजी कि मिकै छुडणी को छी, यैक लिजी यीशु आपण चारों तरफ चाण लागौ। तब उ स्यैणि डरनै-थरथरानै यीशुक पास ऐबेर उनर खुटॉन मिं पड़ी, और वील उनुकै सब सांचि सांचि बतै दे। यीशुल उधैं कौ, "चेली, त्यर विश्वासल तुकै भल करौ। शांतिल जा और आपण रोग कै भुलि जा।" <sup>6</sup>

यौ बखतै याईरक घर बे थ्वाड़ मैस आई और उनुल याईर धैं कौ, "तुमेरि चेलि मरि गे! ऑब गुरु कै कष्ट दिणक के जरूवत न्है।" लेकिन यीशुल उनेरि बात सुणिबेर याईर धैं कौ, "नि डर, मी मिं भरोस धर।" तब यीशुल पतरस, याकूब और यहूनाक अलावा और कैकणी लै आपण दगाड़ नि उण देय।

जब उं याईरक घरक भ्यार पुर्जी, तब यीशुल मैसों कै भौतै डाड़ मारण और चींचाट-पिपाट करण देखौ। तब उनुल उनुधैं कौ, "तुम किलै इदुक हाल्ल-गुल्ल करणाछा, यौ चेलि मरि नि रड़, पर से रे।" यौ सुणिबेर मैस उनर

<sup>6</sup> यहूदियोंक नीमोंक अनुसार एक खून पड़णी स्यैणि अशुद्ध छु, और जो लै उकै छुडुं, उ लै अशुद्ध है जां। अगर यीशु दुसॉर धर्म गुरुओंक चारि हंछी, तब उं उ स्यैणिक जरियल कि यैल मिकै अशुद्ध करि है यौ कारणल भौत नराज है सकछी। यैक लिजी उ स्यैणि यीशुक पास उणक लिजी डरणैछी, लेकिन यीशुल केवल उकै भल करणल ने पर वीक शर्म दूर करणल लै उकै तसल्ली दे।

हसि करण भैटीं, पर उनुल सबों कै भ्यार भेजि दे और सिर्फ चेलिक इज-बाबू और आपण तीन दगडुवों कै लिबेर उ कम्म मिं गईं जां चेलि कै धरि रॉखछी। और यीशुल चेलिक हात थामिबेर कौ, "चेलि, मी तुधैं कूनु, उठ!" तब चेलि झट्ट ज्यून हबेर हिटण फिरण लागी। और यौ देखिबेर मैस भौतै जादा चौक पड़ीं।

और यीशुल उनुकै जोर दिबेर कौ, "जो यां हौ, यैक बारि मिं तुम कैधैं के झन कया। आब यौ चेलि कै खॉण खवाओ।

## यीशु कै उनर गौं वॉलोंल नि अपणाय

(मरकुस ६:१-६)

वांबे जाणक बाद यीशु आपण शिष्योंक दगाड़ नासरत नगर मिं आई, जां उं नॉनछिना बे रई छी।

उं अरामक दिन सभा-घर मिं उपदेश दिण भैटीं। भौतै मैस उनर उपदेश सुणणक बाद दंग हबेर कूण भैटीं, "यीशु इतुक बुद्धिमान कसिक हौ, और वील यौं सब बातोंक ज्ञान प्राप्त कसिक करौ? उ को शक्ति छु जैल उ यौं सब अद्भुत कामों कै करणौ? यौ तो मरियमक च्यल छु जो लाकड़क कारीगर छी, और यैक भै याकूब, यूसुफ, युदस और शिमोन छन, और यैक बैणी हमरै गौं मिं रुनै!" यैक लिजी मैसों कै उनर बारि मिं भैम है पड़ौ।

यौ देखिबेर यीशुल उनुधैं कौ, "परमेश्वरक सेवकों कै भ्यार खूब आदर-सम्मान मिलुं, लेकिन आपण घर, खानदान और नगर मिं उनेरि पूछ नि हुनि।" यीशुल वां उनर अविश्वासक कारणल जादे सामर्थक काम नि करि सक, केवल थवाड़ बिमारों कै आपण हात धरिबेर भल करौ। उं चकित हई कि उं मैस वी पर विश्वास नि करणाछी।

## शिष्य परचारक लिजी जाणई

(मरकुस ६:७-१३)

यीशु उपदेश दिनै-दिनै गौं-गौं मिं घुमणाछी। और उनुल आपण बार शिष्यों कै आपण पास बुलैबेर उनुकै भूतों कै निकालणक अधिकार दे, और यीशु उनुकै द्नी-द्नी करिबेर परचार करण हुं भेजण भैटीं। यीशुल कौ, "बाँटक लिजी जाँठक अलावा के नी ली जाया, न र्वट, न झवल और न बटु मिं डबल। तुम खुटॉन मिं चप्पल पैर सकछा पर दुसर ज्वड़ लुकुड़ नी ल्यै सकना। जो

मैंस तुमुकै आपण घर मिं बुलूं, उ जाँग बे जाण तलक वै रया। जांक मैंस तुमर न स्वागत करनी, न बात सुणनी, तब उ जाँग बे जाण पर आपण खुटक धूल तलक यौ दिखूणक लिजी झाड़ि लिया कि परमेश्वर जरूड उनुकै सजा द्याल।"

और उं नगरों मिं जैबेर मैंसों कै अधर्मक बाँट छोड़िबेर भल बाँट कै अपनूणक लिजी बतूणाछी। और उनुल भौतै मैंसों मिंबे भूतों कै निकालौ और बिमार मैंसोंक ख्वर मिं तेल खितिबेर उनुकै भल करौ।<sup>7</sup>

## यीशु पांच हजार मैंसों कै खाँण खवूणई

(मरकुस ६:३०-४४)

फिर यीशुक शिष्य गौनों मिं परचार करणक बाद यीशुक पास आई। और उं यीशु कै बतूण भैटीं कि हमुल कस-कस करौ और के के सिखा।

लेकिन वां उणी-जाणी वालनैक इतुक भीड़ जाँम है रैछी कि उनुकै खाँण खाँणक मौक लै नि मिलणौछी। यौ देखिबेर यीशुल आपण शिष्यों धैं कौ, "यौ भीड़-भाड़ वालि जाँग बे कै शांत जाँग मिं हिटो, वां अराम करला।" यैक लिजी उं नाव मिं भैबेर सुनसान जाँग न्है ग्याय।

लेकिन भौतै मैंसोंल उनुकै जाण देखौ। जब उं समझि ग्याय कि उं कां जाणई, तब और मैंस दौड़बेर उनर हबेर पैली वां लै पुजि ग्याय।

यीशुल नाव बे उतरण तलक उ ठुलि भीड़ फिर देखी, और उ मैंसों कै देखिबेर यीशु कै उनुमिं दया ऐ गेई, किलैकि उं बिन ग्वावक भेड़ जाँस छी। यैक लिजी उनुल उनुकै भौतै बातोंक बारि मिं बतूणाछी।

जब ब्याल हुण लागी, यीशुक शिष्योंल उनर पास ऐबेर कौ, "यौ जाँग भौतै सुनसान छु। अन्यार लै हुण लागि गो। आँब तुम यौ मैंसों धैं कै दियो कि यौ आँश-पासक गौनों मिं जैबेर आपण लिजी थ्वाड़ खाँण मोल ली लियो।"

यौ बात सुणिबेर यीशुल उनुधैं कौ, "तुम यौ मैंसों कै खाँण दियो!" तब शिष्योंल यीशु धैं कौ, "कसिक खवूनु, हमर पास इतुक डबल कांबे ए रई?" यीशुल शिष्यों धैं पुछौ, "मैंसोंक पास कतुक र्वाट छन? जैबेर मालुम करो।" उनुल पुछिबेर बता, "पांच र्वाट और द्वी माँछ छन।"

फिर यीशुल सबों कै बैठणक हुकुम दे। मैंस सौ-सौ और पचास-पचासक झुंड बणैबेर भै ग्याय। यीशुल उं पांच र्वाट और द्वी माँछ थामी, और स्वर्गक तरफ चैबेर आशीश मांगी। वीक बाद उनुल र्वाट टोड़ी और शिष्यों कै दिने

<sup>7</sup> धर्म-शास्त्र मिं तेल जादेतर परमेश्वरक उपस्थितिक और उनर आशीशक एक चिन्ह छु।

रई कि उं मैसों कै दियो। तब उनुल द्वी मॉछ लै सबन कै बांटे देई। इसिक यीशुल पांच हजार हबेर जादे मैसों कै खाँण खवा। और उं सबोंलै पेट भरिबेर खाँण खा, और वीक बाद फिर लै शिष्योंल र्वट और मॉछक बची टुकुड़ोंल भरी बार डॉल समाई।

## यीशु पाणिक माथि मिं हिटणई

(मरकुस ६:४५-५६)

वीक बाद यीशुल आपण शिष्यों कै नाव मिं बैठेबेर बैतसैदा नगर जाणक लिजी कौ, जो गलील समुद्रक दुसर पार छी। और भीड़ कै भली कै बिदा करणक बाद उं प्रार्थना करणक लिजी डॉन मिं जानै रई। रात ब्याण बखत शिष्यों कै नाव चलूण भारि पड़गैछी किलैकि हाव बयाव भौत तेज छी। तब यीशु पाणिक माथि मिं उनर दगाड़ हिटण लागौ। लेकिन शिष्योंल उनुकै



यीशुक चमतकारल हजारों मैस खाँण खाणई

पाणि मिं हिटण देखिबेर सोचौ कि यौ कवे भूत छु! और तब उं चिल्लाट पाड़न भैटी, तब यीशुल उनुधै बात करी और कौ, "हिम्मत करो, डरो ज्ञन, मी छूं!"

तब उं उनर दगाड़ नाव मिं गेई और हाव बयाव थॉमी गेई। यौ देखिबेर शिष्य भौतै दंग छी कि उनुल के करौ। उं भली कै समझि नि पाई कि उं कतुक सामर्थी छन।

यैक बाद यीशु और शिष्य समुद्रक पार गिनेसरेत नगर मिं पुर्जी। जब यीशु नाव बे भ्यार आई, तब वांक मैसोंल उनुकै पछयाण ले। और उं चारों तरफ बे दौड़बेर आपण बिमारों के चारपाई मिं धरिबेर यीशुक पास ल्याई। और यीशु जां लै जांछी, मैस आपण-आपण बिमारों कै बजार मिं धरछी और उनुधै विनती करछी कि आपण लुकड़क एक टुक छुडण दियो। और उनुल उनुकै छुडौ, उं चंग है ग्याय।

## यीशु शुद्ध और अशुद्धक बारि मिं समझूणई

(मरकुस ७:१-२३)

यहूदी धर्म गुरु और सब दुसॉर यहूदी लै तब तलक खॉण नि खांछी, जब तलक कि उं एक खाश ढडल आपण हात नि ध्वेछी। लेकिन जब थ्वाड़ धर्म गुरुऑल यीशुक शिष्यों कैं बिन उ ढडल हात धोइयै खॉण खॉण देखौ, तब उनुल यीशु धैं पुछौ, "तुमार शिष्य पुरखोंक रीती रिवाजोंक पालन किलै नि करन? उं आपण खॉण बिना हात धोइयै किलै खांनी?"

यीशुल जबाब दे, "परमेश्वरल यशायाह नबीक जरियल तुमर जस कपटी मैसोंक बारि मिं कौछी,

"यौ म्यर आदर सिर्फ मुखल करनी और इनर मन मी हबेर हमेशा दूर छु।  
उनर अराधना करण बेकार छु किलैकि उं मैसोंक बणाई नीमों कैं  
इसिक सिखूनी जस कि उं म्यार नियम हो।"

तुम लै मैसोंक बणाई रीती रिवाजोंक पालन करछा और परमेश्वरक हुकुम कैं टॉल दिंछा!"

फिर यीशुल उनुधैं कौ, "तुम आपण नीमों कैं बणूणक लिजी परमेश्वरक हुकुम कैं कतुक चालाकिल छोड़ि दिंछा। किलैकि परमेश्वरल आपण सेवक मोशेशक जरियल हमुकैं यौ हुकुम दे कि तुम आपण इज-बाबूक आदर करो और यौ लै कि जो आपण इज-बाबू कैं नक-भल कूं, उ पक्क मारि डाली जॉल। लेकिन तुम आपण हिसाबल यौ हुकुमक बिल्कुल उल्ट करछा। जस अगर क्वे मैस आपण इज-बाबू धैं कूं कि मी तुमेरि के मधत नि करूं, किलैकि जे लै मी तुमुकैं दिणिवाँल छी, उ परमेश्वर कैं द्यूँल, तब तुम यौ भल मानछा! और यौ करिबेर तुम आपण बणाई रीती-रिवाजोंल परमेश्वरक बचन कैं टॉल दिंछा। यस्सै तुम भौतै बातों कैं करनै रुंछा।"

यीशुल फिर सब मैसों कैं आपण पास बुलैबेर कौ, "तुम सब मेरि बातों कैं सुणिबेर समझि लियो। क्वे लै खॉण जो मैस खां, या वीक क्वे लै खॉण खॉणक तरिक, उ उकैं अशुद्ध नि करन, लेकिन जो मैस मिंबे भ्यार उं, वी उकैं अशुद्ध करूं। यकैं सुणो और सिखि लियो।"

फिर यीशु मैसों कैं छोड़िबेर उ घर भितेर गो जां उं रुणाछी। तब उनार शिष्योंल यौ बातोंक अर्थ पुछौ। तब यीशुल कौ, "के तुम लै इतु अनजान छा, के तुम इतुकै नि समझना कि जो लै खॉण भ्यार बे मैसक भितेर जां, उ मैस कैं अशुद्ध नि करि सकन? किलैकि उ मैसोंक मन मिं नै, बल्किन उनर

पेट मिं जां और सनडांस बे भ्यार ऐ जां।" यस कैबेर यीशुल सब खॉणी चीजों कै सही ठैरा।

यीशुल फिर कौ, "मैसक मन बे जो बुरि बात-विचार भ्यार उं, वी उकै अशुद्ध करूं। किलैकि मैसोंक मनक भितेर बे बुर विचार निकलनी जस कुकर्म, चोरि, खून, कामुकता, लालच, शत्रुता, धक्कबाजी, दुष्टता, जलन, बुराइ, घमण्ड, अधर्म, मूर्खता। यों सब खराब-खराब बात मैसोंक भितैरे बे निकलनी और वी उनुकै अशुद्ध करनी।"

## एक पराइ मुल्ककि स्यैणि यीशु मिं विश्वास करूं

(मरकुस ७:२४-३०)

तब यीशु उ जाँग कै छोड़िबेर सूर नगरक ऑश-पासक जाँगक तरफ जानै रई। वां उं एक घर मिं गई, और उ नि चाँछी कि कैकै लै उनर उणक पत्त चलो, लेकिन उं आपुं कै छिपै नि सक। एक यूनानी स्यैणि जैकि चेलि मिं भूत छी, उ यीशुक बारि मिं सुणिबेर उनर पास ऐ और उनर खुटॉन मिं पडि पडी। और वील आपण चेलि मिंबे भूत कै निकालणक लिजी यीशु धै बिनती करी।

यीशुल वीक विश्वास जांचणक लिजी उधै कौ, "अगर मी तेरि मधत करूं, जबकि तु यहदी लै न्हैती, तब यौ उस हवल जस कि एक बौज्यू आपण नॉनतिनोंक खॉण कै आपण नॉनतिनों कै दिण है पैली कुकूरों कै दी द्यूं।"

तब स्यैणिल उकै जबाब दे, "ठिक छु प्रभु, लेकिन कुकूर लै नॉनतिनोंक जुठ-पिठ कै खै लिंनी!" यीशुल उधै कौ, "यौ जबाबक कारण तु बेफिकर हबेर आपण घर जा, तेरि चेलि ठिक है गे।" और जब उ स्यैणि आपण घर लौटी, तब वील देखौ कि वीकि चेलि चुपचाप आपण चारपाई मिं सित रै और भूतल उकै छोड़ि है।

## यीशु एक कॉल मैस कै भल करणई

(मरकुस ७:३१-३७)

फिर यीशु वांबे हिटिबेर दिकापुलिसक गौनों मिं गई जो गलीलक समुद्रक पार छी। वां यीशुक पास मैस एक बिमार कै ल्याई जो कान नि सुणछी और भली कै बुलै लै नि सकछी। और उनुल यीशु धै विनती करी, "तुम येमिं हात धरि दियो जैल यौ ठिक है जॉल।"

वीक बाद यीशु उ मैस कैं भीड़ बे अलग ली गई और वीक कान मिं आपण आडू खिती और वीक जिबड़ मिं आपण थूक लगा। और अगाशक तरफ चैबेर गंभीरताल प्रार्थना करणक बाद उनुल कौ, "खुलि जा!" और उ बखतै बे उ मैस कान सुणन भै गोय और भली कैबेर बुलाण लागौ।

यौ सब देखिबेर मैस भौतै चकित है पड़ीं और खुशील कूण भैटीं, "जो यौ करणई, ठिक करणई! यौ तो जो बुलै नि सकन उनुकैं बोलि दिंनी, और जो कान नि सुणन, उं सुणन भै जानी!"

और यीशुल मैसों धैं कौ, "यौ बातक बारि मिं तुम कै धैं के झन कया।" लेकिन जतुक उनुल मना करौ, उं उतुकै उनर बारि मिं जादे प्रचार करण भैटीं।

## यीशु ऐल चार हजार मैसों कैं खाँण खवूणई

(मरकुस ८:१-१०)

थ्वाड़ दिनोक बाद फिर यीशुक सामण एक ठुली-ठुलि भीड़ जाँम है रैछी। उ मैसोंक पास मिं खाँणक लिजी के नि छी। तब यीशुल आपण शिष्यों कैं बुलैबेर कौ, "मिकैं यौ मैसों कैं देखि दया उणै। इनर पास खाँण लै न्हैं किलैकि यौ तीन दिन बे म्यर दगाड़ छन। अगर मी यौ मैसों कैं भुकै घर भेजि दियूं, तब इनुकैं हितन-हितनै बाँट मिं चक्कर ऐ जाँल, किलैकि क्वे-क्वे भौतै दूर बे आई छिन।"

तब उनार शिष्योंल कौ, "यौ खालि जाँग मिं इतुक मैसोंक खाँणक इंतजाम कसिक है सकुं?" लेकिन यीशुल शिष्यों धैं पुछौ, "तुमर पास कतुक र्वाट छन?" उनुल कौ, "सात।"

फिर यीशुल मैसों कैं बैठणक हुकुम दे और र्वाट लिबेर उनुल परमेश्वर कैं धन्यवाद दे। तब उनुल र्वाट टोड़िबेर आपण शिष्यों कैं दिनै रेईं और शिष्य मैसों कैं दिनै गईं। उनर पास थ्वाड़ नॉन माँछ लै छी। यीशुल परमेश्वर कैं धन्यवाद दिबेर कौ, "यौ माँछ लै बाँटि दियो।" और सबनलै पेट भरि खा। वीक बाद उनुल बची र्वाँटोंक टुकुड़ोंक सात डॉल भरिबेर समाईं। खाँण खाँणी मैस चार हजार है जादे छी। फिर यीशुल उनुकैं विदा करौ।

और यैक बाद यीशु नाव मिं भैबेर आपण शिष्योंक दगाड़ दलमनुथा जाँग मिं जानै रईं।

## धर्म गुरु यीशुक इम्तिहान लिणई

(मरकुस ८:११-२१, मती १६:१२)

तब धर्म गुरु ऐबेर यीशुक दगाड़ बहस करण भैटीं। यीशुक इम्तिहान लिणक विचारल उनुल कौ, "तुम हमर लिजी कवे लै चमतकारी काम करो जैल हम जाणि सकूं कि तुम परमेश्वरक च्यल छा या न्हैता!" यीशुल लम्बि सांस लिबेर कौ, "तुम चिन्ह किलै मांगणाछा? मी सांचि कूणयूं, कि कवे लै चिन्ह नि द्यूं।"

यीशु धर्म गुरुओं कै छोड़िबेर शिष्योंक दगाड़ समुद्रक पारक किनार मिं जानै रई। शिष्य नाव मिं खाँण ली जाण भुलि ग्याछी और उनर पास एक र्वटक अलावा और के नि छी। यीशुल उनुकै सावधान करणक लिजी कौ, "धर्म गुरुओंक खमीरी र्वट कै देखिबेर होशियार रओ।"

शिष्योंल यौ सोचौ कि हमर पास खाँण न्है, यैक लिजी यौ यस कूणई।

शिष्य के कूणई कैबेर, यीशुल उनेरि बात सुणी और निराश हबेर उनुधैं कौ, "तुमर पास र्वट न्है कैबेर तुम परेशान किलै हैराछा? के तुम आइ तलक नि समझा, के तुमर पास बुद्धि न्हैती? के तुम आँख हुणक बाद लै देखि नि सकनया, और कान हबेर लै सुण नि सकनया? के तुमुकै याद न्हैती कि जब मील पांच हजार मैसोंक लिजी पांच र्वाटक टुकुड़ करीं, तब तुमुल कतुक बची डॉल भरीं?" उनुल कौ, "बार डॉल।" और जब मील चार हजारोंक लिजी सात र्वाटाँक टुकुड़ करीं, तब तुमुल र्वटाँक टुकुड़ौल भरी कतुक डॉल समाई?" उनुल कौ, "सात।" तब यीशुल उनुधैं कौ, "तुम आइ लै नि समझा?"

तब शिष्यों कै समझ ऐ कि यीशुल उनुकै खमीरी र्वट बे नै बल्किन धर्म गुरुवोंक सीख बे सावधान रुणक लिजी कौ।

## यीशु एक काँण कै भल करणई

(मरकुस ८:२२:३०)

फिर यीशु और उनार शिष्य बैतसैदा गौं मिं पुजीं। तब थ्वाड़ मैस एक काँण मैस कै यीशुक पास ल्याई और उनुधैं विनती करण भैटीं कि तुम यकै छुबेर ठिक करि दियो।

तब यीशु वीक हात पकड़िबेर गौं बे भैर ली गई। और वां जैबेर उनुल वीक आँखों मिं लगूणक लिजी थुकौ, और आपण हात वीक आँख मिं

धरिबेर हटूणक बाद पुछौ, "के तुके देखीणौछा?" वील ऑख उठैबेर कौ, "मी मैसों के देखि सकनू लेकिन साफ नै, उं बोट जस देखीनी और हिटनी।"

तब यीशुल फिर कॉणक ऑखों मिं आपण हात धरौ। कॉणल वारपार चैबेर कौ, "होई, ऐल मी साफ देखणयूं!"

यीशुल उके समझैबेर कौ, "सिद्द आपण घर जा और गौं मिं यौ बातक बारि मिं कै धै के लै नि कए।"

फिर यीशु और उनार शिष्य कैसरिया फिलिप्पीक बॉट वार-पारक सब गौनों मिं जानै रई। बॉट मिं यीशुल आपण शिष्यों धै पुछौ, "मैस मिंके के समझनी?"

शिष्योंल यीशु धै कौ, "मैस तुमुके यहूना पाणिक बपतिस्मा दिणिवॉल, या एलियाह या कवे दुसर परमेश्वरक दूत समझनी जो मरियों मिंबे ज्यून हई छन।"

यीशुल आपण शिष्यों धै पुछौ, "और तुम के समझछा कि मी को छूं?" पतरसल जबाब दे, "तुम हमर मुक्तिदाता छा!" यीशुल उधै कौ, "त्विल ठिक कौ, लेकिन यौ बातक बारि मिं तुम मैसों धै ऐल के ज्ञन कया।"

## यीशु बतूणई कि मी मारी जूल

(मरकुस ८:३१-३८, ९:१)

फिर यीशु उनुके बतूण लागीं, "मी जो परमेश्वरक तरफ बे ऐ रयूं, मी भौतै सताई जूल। धर्म गुरु, याजकोंक सैप और प्रधान सब म्यर निरादर-तिरस्कार करॉल, और उं मिंके मारि द्याल। लेकिन वीक तिसर दिन मी मरिबेर ज्यून करी जूल।" लेकिन यौ बात सुणिबेर पतरस उके एक तरफ लिगो और नड़कैबेर कूण भैटौ, "तुमुके यस नि कूण चैछी।"

लेकिन यीशुल पछिन मुड़िबेर पतरस के फिटकार लगैबेर कौ, "शैतान, तु मी हबेर दूर न्है जा, किलैकि त्यर सोच-विचार परमेश्वरक जस न्है पर मैसोंक जस छु। तब तु येसि बात करणौछै।"

तब यीशुल दुसॉर मैसों के लै बुलैबेर कौ, "जो लै म्यर शिष्य बणण चां, उ आपण सबै मंशाओं के छोड़िबेर म्यर पछिल ऐ जाओ, चाहे यैक बदाव तुमार प्राण न्है जाओ। किलैकि जो आपण प्राण के बचूण चां, उनुके अनंत जीवन नि मिलल। लेकिन जो म्यर लिजी आपण प्राण के दिणक लिजी तैय्यार हवल, उनुके अनंत जीवन मिलल।"

अगर मैंस पुर संसार कै पै ल्यल लेकिन अनंत जीवन कै गवै द्यल, तब उकै यौ बातों के फैद? किलैकि जब तुमुल आपण अनंत जीवन कै एक बारि छोड़ि हैलौ तब उकै दुबार पाणक लिजी तुम परमेश्वर कै के लै नि दी सकना।

अगर तुम यौ कुकरमी और पापी मैंसोक सामण मिक्कै और म्यार बताई बातों कै अपनूण मिं शर्माला, तब जब मी आपण पिताक महिमा और पवित्र स्वर्गदूतोंक दगाड़ ऊंल, तब मी लै तुमुकै नि अपनू।"

यीशुल यस लै को, "मी तुमुधैं सांचि कूनु कि यां ठाँड़ हई मैंसों मिंबे कवे याँस लै छन जो उ बखत तलक नि मराल, जब तलक परमेश्वरक राज कै सामर्थक दगाड़ आइ नि देखि ल्याल।"

## शिष्य यीशुक असल रूप देखणई

(मरकुस ६:२-१०)

छै दिनक बाद यीशु आपण शिष्य पतरस, याकूब और यहूना कै लिबेर एक उंच डॉनक एकांत मिं गई। वां उनर सामण यीशुक रूप बदेई गोय। उनार लुकुड़ याँस चमकिल और सफेद है ग्याय कि धरति मिं कवे लै धोबि उनुकै इदुक साफ नि करि सकछी। और शिष्योंल एकदम आपण पुरखा एलियाह और मोशेश कै लै वां देखौ, जो यीशुक दगाड़ बात करणाछी।<sup>८</sup>

तब पतरसल यीशु धैं कौ, "गुरुज्यू, यौ कतुक भल छु कि हम लै यां छूं। हम तीन तम्बू ठाँड़ करनू, एक तुमर लिजी, एक मोशेशक लिजी और एक एलियाक लिजी।" वीक समझ मिं के नि उणौछी कि हम के कूनु, किलैकि यौ सब देखिबेर उं भौतै डरि ग्याछी।

तब एक बादोवल ऐबेर उनुकै ढक दे और उ बादोव मिंबे परमेश्वरक यौ अवाज ऐ, "यौ म्यर लाड़िल च्यल छु, यैक बात कै मानो!"



शिष्य यीशुक असल रूप देखणई

<sup>८</sup> एलियाह और मोशेश द्विवै परमेश्वरक सेवक छी। उनर बारि मिं यहूदियोंक धर्म-शास्त्र मिं बताई जां। परमेश्वर यां दिखूणई कि यीशु धर्म-शास्त्रक बात पुर करनी।

एकाएक जब शिष्योंल आपण नजर इथां-उथां डाली, तब उनुल वां यीशुक अलावा और कैकणी नि द्यख।

जब उं डॉन बे तलि उणाछी, उ बखत यीशुल आपण शिष्यों कैं समझा, "जो तुमुल देखौ, वीक बारि मिं मैसों धैं तब तलक के लै झन कया, जब तलक कि मी मरिबेर ज्यून नि है जूँल।" और उनुल यौ बात कैं आपण मन मिं धरि रॉखछी, लेकिन उं आपस मिं बात करणाछी कि मरिबेर ज्यून है उठणक के मतलब छु।

## यीशु भूत लागी च्यल कैं भल करणई

(मरकुस ६:१४-२६)

जब यीशु और वीक तीन शिष्य वां आईं जां दुसॉर शिष्य छी, तब उनुल देखौ कि भौतै मैस उनार चारों तरफ जाँम है रई और उं धर्म गुरुओंक दगाड़ बहस करणई। और जब मैसोंल यीशु कैं वां उण देखौ, तब उनुल ऐबेर उनुकें पैलाग करौ।

तब यीशुल शिष्यों धैं पुछौ, "तुम इनर दगाड़ बहस किलै करणाछा?" इतुकै मिं भीड़ मिंबे एक मैसल जबाब दे, "गुरुज्यू, मी आपण च्यल कैं यां ल्यायूं कि तुम उकैं भल करि द्यला, किलैकि उमिं एक भूत छु जो उकैं बुलाण नि दिन। और जां-तां उ भूत उकैं पकड़िबेर च्यापि दीं, वीक खाप बे गाज उं, उ दांत किटकिटूं और फिर लकड़ी जां। यैक लिजी मील तुमर शिष्यों धैं भूत कैं निकालणक लिजी कौ, लेकिन उं नि निकालि सक।"

यौ सुणिबेर यीशुल आपण शिष्यों धैं कौ, "हत तेरि का, के तुमुकैं आइ तलक मि पर विश्वास न्हैंती? मी कदिन तलक तुमर दगाड़ रूल कि तुम विश्वास करला, और तुमर अविश्वास कैं मी कब तलक सहण करूंल? जाओ, उ च्यल कैं म्यर पास ल्याओ।" और उं उकैं उनर पास ली आईं और यीशु कैं देखिबेर भूतल च्यल कैं मरोड़ दे और वीक खाप बे गाज उण भैटौ और उ मांट मिं लोट पोट करण लागौ।

तब यीशुल उ च्यलक बौज्यू धैं पुछौ, "यौ भूत यकैं कब बे लागौ?" वील बता, "नॉनछिना बटी। और यौ भूत यकैं इसिकै परेशानै नि करन बल्किन आंग और पाणि मिं लै खेड़ि द्यूं, जै मिं यौ मरि जाओ। अगर तुम के करि सकछा तब हमु पर दया करिबेर हमेरि मधत करो।" यीशुल उधैं कौ, "अगर-मगर वालि के लै बात न्हैं। मी उनर लिजी सब कुछ करि सकनू जो मी मिं

विश्वास करनी।" तब च्यलक बौज्यूल जोर दिबेर कौ, "म्यर पास विश्वास छु, तुम म्यर विश्वास कैं बढूण मिं मेरि मधत करो!"

जब यीशुल देखौ कि भीड़ बढनै जाणै, उनुल भूत कैं डांटेबेर कौ, "हे कॉल और लाटि आत्मा, मी तुधैं कूनु कि इमिं बे न्है जा और फिर इमिं कभै दुबार झन आए!" और तब उ भूत चिल्लाट पाड़नै उ च्यल कैं मरोडिबेर उ मिंबे जानै रौ और उ च्यल परचेत है पड़ौ। और मैस यस कूण भैटीं कि यौ मरि गो। लेकिन यीशुल उ च्यलक हात पकड़िबेर उकैं उठा और उ ठाँड़ है गोय, और उ बिल्कुल भल है गोय!

जब वांबे यीशु और उनार शिष्य घर आई, तब एकांत मिं उनर शिष्योंल उनुधैं पुछौ, "हमुल उ भूत कैं किलै नि निकालि सक?" यीशुल जबाब दे, "यांस किसमाँक भूतो कैं तुम केवल प्रार्थना करिबेर निकालि सकछा किलैकि इनुकैं निकालणक और क्वे दुसर चार न्है।"

## यीशु दुबार बतूणई कि मी मारी जूल

(मरकुस ६:३०-३२)

यीशु और उनार शिष्य वांबे गलील प्रदेशक तरफ जाणाछी। यीशु नि चांछी कि कैकणी लै यैक पत्त चलो, किलैकि उं आपण शिष्यों कैं उपदेश दिण चांछी उनुल कौ, "मी जो परमेश्वरक तरफ बे आई छूं, मैसोंक हात पकड़ई जूल। और उं मिंकैं मारि द्याल, लेकिन मरियक तिसार दिन मी फिर ज्यून करी जूल।"

पर शिष्य यीशुकि यौ बात कैं समझि नि सक और उं यीशु धैं यैक बारि मिं सवाल पुछण मिं लै डरणाछी।

## जो ठुल हुण चां, उ आपुंकैं नॉन बणाओ

(मरकुस ६:३३-४१)

यैक बाद उं कफरनहूम नगर मिं आई। घर भितेर ऐबेर यीशुल उनुधैं पुछौ, "तुम बाँट मिं के बातक बारि मिं बात करणाछिया?" लेकिन शिष्य शर्मक मारी चुप रई, किलैकि उं बाँट-बाटै यौ बात करणाछी कि उनुमिं सबों हबेर ठुल को छु।

तब यीशुल सब शिष्यों कैं बुलैबेर उनुधैं कौ, "अगर क्वे ठुल हुण चां, तब उ सबन हबेर नॉन बणो और सबनकि सेवा करो।" फिर उनुल एक भौ

कैं लिबेर उनर बीच मिं ठाँड़ करौ। और उकैं काखि मिं लिबेर कौ, "जो म्यर नामल यौ भौ चारि एकक स्वागत करुं, उ म्यर स्वागत करुं। और जो म्यर स्वागत करुं, उ सिर्फ म्यर न बल्किन उनर स्वागत लै करुं जैल मिंकैं भेजि रॉखौ।"

फिर उनर शिष्य यहूनाल कौ, "गुरुज्यू, हमुल एक यस मैस कैं देखौ जो तुमर नामल भूतों कैं निकालपौछी, और हमुल उकैं रोकण लगा किलैकि उ हमर चारि तुमर शिष्य नहैं।"

तब यीशुल जबाब दे, "उ मैस कैं तुम इन रोकिया, किलैकि क्वे यस नहैं जो म्यर नामल सामर्थक काम दिखाल और वीक बाद म्यर निरादर करल। जो हमर विरोधी नहैं, उ हमर तरफ छु।"

होई, यस लै छु कि अगर क्वे एक गिलास पाणि लै यैक लिजी तुमुकैं पिलुं कि तुम म्यर शिष्य छा, तब मी तुमुधैं सांचि कूनु कि परमेश्वर उकैं इनाम जरूड़ द्याल।"

## दुसरो कैं परमेश्वरक बाँट बे नि भटकूण चैं

(मरकुस ६:४२-४८)

लेकिन यीशुल यस लै कौ, "जो परमेश्वर मिं विश्वास करुं, उ मैस चाहे सबों हबेर नॉन किलै नि हो, अगर क्वे मैस उकैं परमेश्वरक बाँट बे भटकूं, तब परमेश्वर उकैं जरूड़ भौतै कठिन सजा द्याल। यौ हबेर उ मैसक लिजी यौ जादे भल हुंछी कि क्वे मैस वीक गव मिं ठुलौ घटक पाथर बादिबेर उकैं गैल ताल मिं खित दिंछी, जैल उ दुसर कैं पाप करणक लिजी नि उकसै सको और परमेश्वरक जरियल मिलणी कठिन सजा है बचि जाओ।"

अगर तुमर हात तुमुकैं परमेश्वरक बाँट बे भटकूं, तब उकैं काटि दियो। जादे भल छु कि तुम एक हातक लुल हबेर अनंत जीवन कैं पाला, कैं यस नि हो कि तुम द्वी हात लिबेर नरक मिं खिती जाओ, जांक आँग मिं तुम हमेशा तलक जलनै रौला।

अगर तुमर खुट तुमुकैं परमेश्वरक बाँट बे भटकूं, तब तुम उकैं काटि दियो। जादे भल छु कि तुम एक खुटक लंगण हबेर अनंत जीवन कैं पाला, कैं यस नि हौ कि तुम द्वी खुट लिबेर लै नरक मिं खिती जाओ।

अगर तुमर आँख तुमुकैं परमेश्वरक बाँट बे भटकूं, तब तुम उकैं निकालि दियो। जादे भल छु कि तुम एक आँखक काँण हबेर परमेश्वरक राज मिं प्रवेश करला, कैं यस नि हो कि तुम द्वी आँख लिबेर लै नरक मिं खिती

जाओ, जां मैंस हमेशा भौतै दुःख पूनी और वांक आँग मिं तुम हमेशा तलक जलनै रौला।"

## तलाकक बारि मिं उपदेश

(मरकुस १०:१-१२)

यैक बाद यीशु कफरनहूम छोड़िबेर यर्दनक पारक प्रदेश मिं आई और वां लै एक भौतै ठुलि भीड़ जाँम है गई। और यीशु उनुकें उपदेश दिण भैटीं जस उं हमेशा दिंछी। तब थ्वाड़ धर्म गुरु यीशुक पास आई और उनुधैं पुछण भैटीं, "नीमक अनुसार क्वे मैंस आपणि घरवाइ कै तलाक दिबेर छोड़ि सकुं या नि छोड़ि सकन?" किलैकि उं यौ जाणन जांछी कि यीशुक राय कैक तरफकि छु।

तब उनुकें यीशुल जबाब दे, "परमेश्वरल आपण सेवक मोशेशक जरियल तुमुकें के नीम दी रॉखी?" उनुल कौ, "मोशेशक नीम मिं लिख रॉखौ कि जो मैंस आपणि घरवाइ कै तलाक दिण चां, उ उकें तलाक-पत्र दिबेर छोड़ि सकुं।"

यीशुल उनुधैं कौ, "मोशेशल यौ यैक लिजी कौ, किलैकि तुम पुरखा आपण जिद्द पुर करण चांछी। और तुम लै यस्सै छा। लेकिन परमेश्वरल संसारक शुरु मिं स्यैणि और मैंस कै बणा कि उं एक दगाड़ रै सको। जब मैंसक ब्या हुं, तब जतुक प्रेम उ आपण इज-बौज्यू कै करछी, उ हबेर जादे प्रेम उ आपण घरवाइक दगाड़ करुं, और यैकै वील उं एककै छन। यैक लिजी जकें परमेश्वरल जोड़ि रॉखौ, मैंस उकें कतई अलग नि करो।"

शिष्योल घर जैबेर यैक बारि मिं यीशु धैं सवाल पुछौ। यीशुल उनुधैं कौ, "जो आपण घरवाइ कै तलाक दिबेर दुसेरि स्यैणिक दगाड़ ब्या करुं, उ आपणि पैली स्यैणिक दगाड़ पाप करुं। और जो घरवाइ आपण पैल आदिम कै तलाक दिबेर दुसर बैगक दगाड़ ब्या करुं, उ आपण पैली बैगक दगाड़ पाप करुं।"

## यीशु नॉनतिनों कै आशिर्वाद दिणई

(मरकुस १०:१३-१६)

थ्वाड़ मैंस नॉना-नॉनतिनों कै यीशुक पास ल्याई कि उं उनुकें छुबेर आशिर्वाद दी सको। लेकिन उनर शिष्योल मैंसों कै डांटौ, "तुम गुरुज्यू कै परेशान नि करो!"

यौ देखिबेर यीशुल भौत नराज हबेर आपण शिष्यों धैं कौ, "नॉनतिनों कैं म्यर पास उण दियो, मना नि करो किलैकि परमेश्वरक राज इनर लिजी छु। मी तुमुधैं सांचि कूनू कि जो मैस परमेश्वरक राज कैं एक नॉनू नॉनतिनक चारि नि अपनाल, उ परमेश्वरक राज मिं कभै नी पुजि सकन।"

फिर यीशुल नॉनतिनों कैं आपण काखि मिं धरौ और एक-एक कैबेर उनर ख्वार मिं हात धरिबेर उनुकैं आशिर्वाद दिबेर कौ, "परमेश्वर हमेशा तुमर भल करनै रवो।"

## अनंत जीवन पाणक लिजी के करण चैं

(मरकुस १०:१७-३१)

यीशु जब बाँट-बाटै कैं जाणौछी, उ बखतै एक मैस दौड़िबेर उनर पास आ और वील उनर सामण घुन टेकिबेर यस पुछौ, "उत्तम गुरुज्यू, परमेश्वरक दगाड़ हमेशा रुणक लिजी मी के करूं?"

यीशुल उधैं कौ, "मिकैं उत्तम किलै कुंछै? परमेश्वर कैं छोड़िबेर और कवे लै उत्तम न्हैं।<sup>९</sup> तु परमेश्वरक देई हुकुम कैं जाणछै हत्या नि करो, कुकर्म नि करो, चोरि नि करो, झुटि गवाहि नि दियो, झुटि बुलैबेर कै धैं के नि लियो, आपण इज-बौज्यूक लिजी भल करो।" वील कौ, "गुरुज्यू, यौ सबै बातों कैं मी नॉन छिनान बे माननू।"

उकैं देखिबेर यीशुक मन मिं प्रेम ऐ पड़ौ। उनुल उधैं कौ, "त्वील एक काम आजि लै नि कर। जा, जे लै त्पर पास छु, उकैं बेचिबेर जो डबल हवाल उनुकैं तु गरीबों मिं बाँटि दे। फिर वीक बाद तु म्यर दगाड़ ऐ जाये। और तब तुकैं स्वर्ग मिं असली धन मिलल।"

यौ सुणिबेर उ मैसक मुखक रंग काव है गोय और उ निराश हबेर वांबे जानै रौ, किलैकि वीक पास भौत धन-सम्पति छी और वीक लिजी यकैं छोड़ण भौत मुशिकल छी।

तब यीशुल शिष्यों धैं कौ, "सेठ-सौकारोंक लिजी परमेश्वरक राज मिं पुजण कतुक मुशिकल छु!" शिष्य यीशुकि यौ बात सुणिबेर चकित रै पड़ीं, लेकिन यीशुल उनुधैं फिर कौ, "दगडुवो, जो धन मिं भरौस धरनी, उनर लिजी परमेश्वरक राज मिं पुजण भौत मुशिकल छु। परमेश्वरक राज मिं

<sup>९</sup> मिकैं उत्तम किलै कुंछै? परमेश्वर कैं छोड़िबेर और कवे लै उत्तम न्हैं, यीशुल यौ यैक लिजी कौ कि उ मैस ध्यान दिबेर सोचो कि उ मिकैं के समझूं। अगर मी उत्तम छु और परमेश्वरक अलावा और कवे लै उत्तम न्हैं तब येल सिद्द है जां कि मी स्वयं परमेश्वर छूं।

एक सेठ-सौकारक पुजण हबेर जादे सितुल ऊंटक शियूणक छेद मिंबे भ्यार निकालण छु।"

यौ सुणिबेर शिष्य और लै जादे दंग है पड़ी और एक-दुसरक दगाड़ बात-चीत करण भैटी, "अगर यस छु, तब कैक उद्धार है सकु?"<sup>10</sup> यीशुल उनुधैं कौ, "मैंसोंक लिजी तो यौ असंभव छु लेकिन परमेश्वरक लिजी सब कुछ संभव छु।"

इतुक मिं पतरसल कौ, "गुरुज्यू, देखो, हम आपण सब कुछ छोड़िबेर तुमर शिष्य बणि गोयूं।" यीशुल कौ, "मी तुमुधैं सांचि कूनू, कि जो लै मैंस म्यर और भलि खबरक लिजी आपण घर, इज-बाबू, भै-बैणी, नॉनतिन और गाँड़-भिड़ सबों कै छोड़ि द्यल, उ यौ सब कुछ कै सौ गुण जादे पाल। पैली उकैं भौत परेशानी लै उठूणि पड़ली, लेकिन यैक बदाव मिं उकैं उणिवाँल बखत मिं अनंत जीवन लै मिलल।

भौत मैंस जो यौ संसारक नजर मिं ठुल छन, उं परमेश्वरक राज मिं नॉन करी जॉल और जो मैंस संसारक नजर मिं नॉन छन, उं परमेश्वरक राज मिं ठुल करी जॉल।"

## यीशु प्रेम करण सिखूणई

(लुका १०:२५-३७)

एक दिन यीशुक इमतिहान लिणक लिजी एक धर्म गुरु आ। वील यीशु धैं पुछौ, "ओ गुरुज्यू, अनंत जीवन पाणक लिजी मिं के करूं?

यीशुल कौ, "धर्म-शास्त्र मिं के लिखी छु, तुम उमिं के पढ़छा?" वील जबाब दे, "तु आपण प्रभु परमेश्वर धैं आपण पुर मनल, पुर ताकत और पुर बुद्धिल प्रेम कर और आपण पड़ोसी कै लै आपण चारि प्रेम कर।"

यीशुल उधैं कौ, "तुमुल ठिक जबाब दे। यस्सै करो, तब तुम ज्यून रौला।"

लेकिन धर्म गुरुल आपुंकैं धर्मी बतूणक लिजी यीशु धैं पुछौ, "म्यर पड़ोसी को छु?"

यीशुल जबाब दे, "एक मैंस छी जो यरुशलेम बे यरीहो नगर जाणौछी। बाँट मिं उकैं चोरोंल पकड़ ले। और उकैं मारि-मारिबेर अधमरी छोड़िबेर वीक समान लुटिबेर न्है ग्याय। थ्वाड़ देर बाद एक याजक उ बाँट बे जाणौछी, लेकिन उ उकैं अन्देखि करिबेर न्है गोय। यैक बाद परमेश्वरक भवन मिं

<sup>10</sup> यहूदी मैंस सोचछी कि अमीर मैंसोंक परमेश्वरक तरफ बे खाश आशिर्वाद मिलीं छु और उं सबों है पैली परमेश्वरक राज मिं पुजॉल। पर यां यीशुल बता कि यस न्हैं।

काम करणी एक मैस लै उ बाँट बे गो। लेकिन वील लै उकै अन्देखि करिबेर न्है गोय। आँब एक सामरी जातिक मैस जनुकै सब तुच्छ समझछी उ बाँट बे जाणौछी। जब वील उ अधमरी मैस कै देखौ, तब उकै तरस ऐ। और वील वीक घौ मिं दवाई पट्टी बादी, और उकै आपण गधा मिं बैठैबेर एक धरमशाव मिं ली गो और वीक सेवा करी। दुसर दिन वील द्वी चांदिक सिक्क निकालिबेर धरमशावक मालिक कै देई, और उधैं कौ, कि तुम यैक सेवा भली कै करिया। तुमर जो लै खर्च लागल मी लौटण बखत तुमुकै दी जूल।"

यीशुल धर्म गुरु धैं पुछौ, "उनुमिंबे उ मैसक सांचि पड़ोसी को छी?" वील जबाब दे, "जैल उमिं तरस खा।" यीशुल कौ, "जाओ, तुम लै यस्सै करो।"

## यीशु प्रार्थना करणक बारि मिं सिखूणई

(लुका ११:१-१३)

एक बखत यीशु एक जाँग मिं प्रार्थना करणाछी। प्रार्थना खतम हुणक बाद उनर एक शिष्यल उनुधैं कौ, "गुरुज्यू, हमुकै प्रार्थना करण सिखाओ।" तब यीशुल आपण शिष्यो धैं कौ, "जब तुम प्रार्थना करछा तब यस कया, हे पिता परमेश्वर, तुमर नाम पवित्र मानी जाओ। तुमर राज आओ। हमुकै हमर रोजक खाँण दी करिया। हमर पापो कैं माफ करिया, किलैकि हम लै आपण सबै कसूरदारन कैं माफ करनू। और हमुकै यस अड़चन मिं नि डालिया कि हम क्वे पाप करि बैठू।"

फिर यीशुल उनुधैं यस लै कौ, "मान लियो क्वे अधरात मिं आपण दगडुवक पास जैबेर यस कओ कि यार, मिंके तीन र्वाट पैच दी दे! किलैकि म्यर एक दगडु सफर करन-करनै म्यर यां पुजि रौ और उकै खवूण-पिवणक लिजी म्यर घर मिं के लै न्हैं। और यौ सब सुणिबेर उ भितेर बे यौ जवाब थोड़ी द्यल कि मिंके परेशान नि कर। आँब तो मील द्वार लै बन्द करि है। और म्यर नॉनतिन लै सित रई, मी उठिबेर तुकै के नि दी सकन। मी तुमुधैं कूनू, अगर उ मैस वीक दोस्त नि लै हो, तब लै उ जरूड़ उठिबेर उकै के लै दियो, किलैकि उ जोर दिबेर मांगणौ।

यैक लिजी मी तुमुधैं कूनू, मांगो, तब तुमुकै दी जॉल, चाला तब पाला, खटखटाला तब तुमर लिजी खोली जॉल। किलैकि जो मांगुं, उकै मिलुं, जो चां, उ पां, और जो खटखटूं, वीक लिजी खोली जां।

अगर तुमर च्यल तुमुधै मॉछ मांगुं, के तुम उकै मॉछक बदाव मिं स्याप थोड़ी द्यला? और अगर उ अंड मांगो, के तुम उकै बिच्छी थोड़ी द्यला? तुम पापी मैस हुण पर लै अगर आपण नॉनतिनों कैं बगैर क्वे रोक-टोकक भलि चीज दिण जाणछा, तब तुमर पिता परमेश्वर लै आपण मांगणिवॉलों कैं पवित्र आत्माक दान किलै नि द्याल?

## परमेश्वर मिं भरौस धरण चैं

(लूका १२:२२-३४)

यीशुल फिर कौ, "मी तुमुधै कूनू कि फिकर नि करो, न आपण जिन्दगीक लिजी कि हम के खूल और न आपण आडक लिजी कि हम के पैरूल। किलैकि जिन्दगी खाँण, और आड लुकुड़ हबेर बढिबेर छु। तुम काँवों कैं ध्यानल द्यखो! उं न तो ब्वैनै और न काँटनी, न तो उनार भकाँर छन और न खाव। तब लै परमेश्वर उनुकै खवूं। और तुम यौं सब प्वथीलों बे भौतै बढिबेर छा! के तुम फिकर करिबेर आपण उमर कैं एक घड़ि भर थोड़ी बढे सकछा? अगर तुम इदुक नॉन काम लै नि करि सकना, तब दुसेरि बातोंक लिजी फिकर किलै करछा?

फूलों कैं द्यखो कि उ कसिक बढनी। उं न तो मेहनत करनी और न कोशिश करनी, फिर लै मी तुमुकै बतूनू कि सुलेमान रॉज लै आपण सारि शान-शौकत मिं लै उनुमिं बे एकक चारि लै सजी-धजी नी छी। हे कम भरौस करणियो, अगर परमेश्वर मैदानक घा कैं जो आज छु और भोव आँग मिं खित दी जॉल इसिक पैरूनी, तब उं तुमुकै किलै नि पैराल?

यैक लिजी तुम लै यौ बातक लिजी के फिकर नि करो कि हम के खूल या के प्यूल। दुनियाँक सब मैस यौ चीजोंक पछिल दौड़नी, पर तुमर पिता परमेश्वर जाणनी कि तुमुकै यौं सब चीजोंक जरवत छु। यैक लिजी तुम सबों है पैली परमेश्वरक राज्यक तरफ आपण मन लगाओ, तब यौं सब चीज लै तुमुकै आफी मिलि जालि।



यीशु मैसों कैं प्रचार करणई

ऐ नॉन झुंड, नि डर, किलैकि तुमर पिता परमेश्वरल तुमुकै आपण राज दिणक किरपा करि है। आपण जैजाद कै बेचिबेर दान करि दियो। तब तुम आपण लिजी यस बटटु बणाओ जो कभै नि फाटन, और स्वर्ग मिं कभै नि निमणी धन जॉम करो। वां न तो क्वे चोर उं और न किड़ खानी। किलैकि जां तुमर धन छु, वैं तुमर मन लै लागि रुं।"

## आपण कैं ठुल नि समझण चैन

(लूका १८:६-१४)

यैक लिजी कि थ्वाड़ मैस आपुं कैं धर्मी माननी, और दुसरों कैं नीच समझनी, उनर लिजी यीशुल यौ किस्स सुणा।

"द्वी मैस प्रार्थना करणक लिजी परमेश्वरक भवन मिं गई। उनुमिंबे एक धर्म गुरु छी और दुसर चुंगी लिणी छी। और धर्म गुरु ठाँड़-ठाँड़ येसि प्रार्थना करछी, "हे परमेश्वर, मी तुमुकैं धन्यवाद दियूं कि मी दुसोर मैसोक जस चोर, अन्यायी, कुकर्मी न्हैतियूं और न यौ चुंगी लिणिवालक जस छूं। मी हफ्त मिं द्वी बार बर्त धरनू और आपण पुर कमाइ मिंबे दान लै दिनु।"

लेकिन चुंगी लिणी मैस थ्वाड़ दूर मिं ठाँड़ छी और उकैं शरमल स्वर्गक तरफ अँख उठूणक हिम्मत लै नि हइ। और वील आपण छाति पिट-पिटबेर कौ, "हे परमेश्वर, मी पापि मिं दया करया!"

यीशुल कौ, "मी तुमुधैं कूनू कि उ धर्म गुरु नै बल्किन चुंगी लिणी पाप मांफ हबेर आपण घर गो। किलैकि जो क्वे लै आपुं कैं ठुल समझूं, उ नॉन करी जॉल। लेकिन जो आपुं कैं नॉन समझूं, उ ठुल करी जॉल।"

## पापि मैसक बचणल परमेश्वर खुश हुंनि

(लूका १५:१-३२)

यीशुक उपदेश सुणनक लिजी चुंगी लिणी और दुसोर मैस जो धर्म गुरुओक नजर मिं पापी मानी जांछी, उ लै यीशुक पास उणाछी। यौ देखिबेर धर्म गुरु रीसल यीशु कैं अंट-शंट कूण लागीं, "यौ पापियोक दगाड़ मेल-जोल धरनी और उनर दगाड़ खॉण लै खानी!" तब यीशुल उनुकैं यौ किस्स सुणा, "तुमुमिंबे को यस मैस छु, जैक पास सौ भेड़ हो और उनुमिंबे एक हरे जाओ। तब उ निन्यानबे भेड़ो कैं खुल मैदान मिं छोड़िबेर उ हराई भेड़ कैं उ बखत तलक चाल, जब तलक उ मिल नि जाओ। जब उ मिल जां, तब

उ खुशि हबेर उकै काखि मिं पकडुं। और घर जैबेर आपण दगडुवोंक और पड़ोसियों कें बुलैबेर उनर दगाड़ खुशी मनाल, किलैकि उकै वीक हराई भेड़ मिलि गो। मी तुमुधैं कूनू, इसिकै स्वर्ग मिं लै उ निन्यानबे धर्मी, जनुकै मन फिरावक जरवत न्हैं, उनर लिजी लै इदुक खुशी नि मनाई जानि, जदुक कि एक पापिक मन फिराव करणल मनाई जै।

यां यैसि को स्यैणि ह्वेलि जैक पास चांदिक दस सिक्क हो और एक हरै जाओ, तब उ बती जलैबेर भितेर तब तलक झाड़ि-झूड़िबेर चालि, जब तलक उ मिल नि जाओ। और जब उ मिल जां, तब उ आपण दगडुवों और पड़ोसियों कें बुलैबेर कुं, "म्यर दगाड़ खुशी मनाओ! किलैकि मील उ हराई सिक्क कें पै है।"

यीशुल फिर कौ, "मी तुमुधैं सांचि कूनू, इसिकै परमेश्वर आपण स्वर्ग दूतोंक दगाड़ एक मन फिरुणी पापिक लिजी खुशी मनूनै।"

यैक बाद यीशुल फिर कौ, "क्वे मैसॉक द्वी च्याल छी। एक दिन नॉन च्यलल आपण बौज्यू धैं कौ, "बौज्यू, मिंके जमीन-जैदाद मिंबे म्यर हिस्स दी दियो।" तब बौज्यूल उनुमिं आपण जमीन-जैजाद बांटे दे। यैक थ्वाड़ बखत बाद नॉन च्यल आपण हिस्सक जमीन-जैजाद बेचिबेर दूर देश जानै रौ, और वां वील आपण सब नक-भल शौक पुर करिबेर आपण सब धन बरबाद करि दे। जब वील सब धन खर्च करि हैछी, तब उ देश मिं भारि अकाल पड़ौ और उ कंगाल है गोय। यैक लिजी वील उ देशक एक मैसक घर मिं सरण ले, और वील उकै आपण सुंअर चरूहूं भेजौ। और उकै इतुक जादे भुक लागी कि जो खाँण सुंअर खाँछी, वील लै उ आपण पेट भरणक लिजी तरसछी, लेकिन क्वे उकै के नि दिंछी। लेकिन जब उकै होश ऐ, तब वील कौ, "म्यर बौज्यूक कतुक नौकरों कें पेट भर खाँण मिलूं, पर मी यां भुकै मरणयूं! आँब मी आपण बौज्यूक पास जुंल और उनुधैं कूल, "बौज्यू, मील परमेश्वर और तुमर खिलाफ पाप करि रॉखौ। मी तुमर च्यल कहलुणक लैक न्हैंतियूं, तुम मिंके आपण नौकर समझिबेर धरि लियो।"

फिर उ उठिबेर आपण बौज्यूक पास जाणक लिजी बाँट लागौ। जब उ दूर बाँट मिं छी, वीक बौज्यूल उकै देखिबेर पछ्याण ले। और उं दयाल भरी ग्याय, उं दौड़िबेर वीक पास गई और अडाव खितिबेर उकै प्यार करौ। लेकिन वील आपण बौज्यू धैं कौ, "बौज्यू, मील परमेश्वर और तुमर खिलाफ लै पाप करि रॉखौ। मी तुमर च्यल कहलुणक लैक न्हैंतियूं।" लेकिन वीक बौज्यूल आपण नौकरों कें बुलैबेर कौ, "जल्दी भॉल-भॉल लुकुड़ ल्यैबेर

यकै पैराओ, यैक हातों मिं मुनेणि और खुटों मिं ज्वात खितो! और दावतक इंतजाम करो ताकी हम सब खुशी मनूल। किलैकि म्यर यौ च्यल मरि गोछी, लेकिन आँब ज्यून है गो, यौ हरै गोछी, लेकिन आँब मिलि गो!" और उं सब खुशी मनूण लागीं।

उ बखत वीक ठुल च्यल गाँड़ मिं छी। जब उ वापिस घर आ, तब वील घर भितेर बे नाच-खेलकि अवाज सुणी। तब वील एक नौकर कैं बुलैबेर उधैं पुछौ, "यौ सब के हुणौ?" नौकरल कौ, "तुमर भै ऐ रौ, और तुमर बौज्यूल दावत करि राँखी। किलैकि उनुल उकैं ठिक-ठाक वापिस पै राँखौ!"

यौ सुणिबेर ठुल च्यल कैं रीस ऐ और उ घर भितेर नि जाण चाँछी। तब वीक बौज्यू उकैं मनूणक लिजी वीक पास भ्यार आई। लेकिन वील आपण बौज्यू धैं कौ, "द्यूखो, मी इदुक सालों बे एक दासक चारि तुमेरि सेवा करणयूं। मी तुमर हुकुमक खिलाफ कभै नि गोय। फिर लै तुमुल मिक्कैं कभै एक बकरक पाँठ तलक नि देइ कि मी आपण दगाड़वोंक दगाड़ खुशी मनै सकूं। लेकिन जसै तुमर यौ च्यल वापिस आ, जैल तुमेरि सारि दौलत उड़ै है, तुमुल वीक लिजी दावत करि राँखी!"

बौज्यूल उधैं कौ, "च्यला, तु तो हमेशा म्यर दगाड़ रुँछै और जे लै म्यर छु, उ त्यरै छु! लेकिन हमुकैं आँब खुशी मनूण चैं, किलैकि त्यर यौ भै मरि गोछी, आँब ज्यून है गो, और हरै गोछी, आँब मिलि गो।"

## यीशु तिसेरि बारि बतूणई कि मी मारी जूल

(मरकुस १०:३२-३४)

यैक बाद यीशु आपण शिष्योंक दगाड़ यरुशलेमक बाँट मिं जाणाछी। उनार शिष्य और दगाड़-दगाड़ै उणी मैस डरी हुई छी, किलैकि जां यीशु जाणाछी वांक मैस वीक खिलाफ छन, फिर लै यीशु वां किलै जाणौ? तब यीशु आपण बारि शिष्यों कैं अलग लिजैबेर उनुकैं बतूण भैटीं कि मि पर के के बितेलि। उनुल कौ, "देखो, हम यरुशलेम जाणयूं और वां मी याजकोंक सैप और धर्म गुरुओंक हात मिं सौपी जूल और उं मिक्कैं जानल मारणक लैक ठैराल और रोमी सरकारक हात मिं सौप द्याल। और रोमी म्यर निरादर कराल, मी मिं थुकाँल, मिक्कैं हन्टरल माराल और मिक्कैं मारि द्याल, लेकिन मी मरियक तिसार दिन फिर ज्यून करी जूल।"

## द्वी शिष्य सबों है ठुल हुण चांछी

(मरकुस १०:३५-४५)

हिटन-हिटनै शिष्यों मिं बे द्वी भै, याकूब और यहूनाल यीशु धै कौ, "गुरुज्य, हम चांनू कि जे के लै हम तुमुधै मांगूं, तुम उकै पुर करला।" तब यीशुल उनुधै कौ, "तुम के चांछा? मी तुमर लिजी के करूं?" उनुल कौ, "जब तुम रॉज बणला, तब हमुकै सबन हबेर ठुल पद मिं बैटैबेर आपण दैण और बाँ तरफ बैठणक हुकुम दिया।" यीशुल उनुधै कौ, "तुम नि जाणना कि तुम के मांगणाछा। जो दुःख मील सहण छु, के तुम उकै सह पाला? जो अत्याचार मिंके सहण छु, के तुम उकै सह पाला?" उनुल जबाब दे, "होई, हम सह सकनू।" यीशुल कौ, "जो दुःख और अत्याचार मिंके सहण करण छु, सांचि-मुची उ तुम लै सहला। लेकिन तुमुकै आपण दैण या बाँ तरफ बैठण म्यर काम न्है, किलैकि यौ जाँग उनेरि छु, जनर लिजी परमेश्वरल यौ तैय्यार करि रॉखी।"

जब बाकि दस शिष्यों कैं यौ बातक पत्त चलौ कि याकूब और यहूना ठुल बणणकि बात करणाछीं, तब उं उनुकै देखिबेर नराज हई। लेकिन यीशुल सब शिष्यों कैं आपण पास बुलैबेर कौ, "तुम जाणछा कि जो यौ दुनी मिं अधिकारी मानी जांनी, उं आपण जनता मिं आपण मनक राज करनी। लेकिन तुम जो म्यर पछिल उणाछा तुमुमिं येसि बात नि हुण चैनि। जो तुमुमिं ठुल हुण चां, उ सबनक सेवक बणो। और जो तुमुमिं प्रधान हुण चां, उ सबनक दास बणो। उसिकै मि परमेश्वरक तरफ बे यैक लिजी नि आय कि मी मैसों धै आपण सेवा करूं, बल्किन यैक लिजी आयूं कि मी खुद सब मैसोंक सेवा करूं और भौतोंकि मुक्तिक लिजी आपण खून कैं पाणिक चारि बगै दयूं।"

## यीशु फिर एक काँण कैं भल करणई

(मरकुस १०:४६-५२)

यैक बाद जब उं यरीहो नगर बे जाणाछी, तब उ बखत सड़कक किनॉर मिं एक काँण भीख मांगणौछी, जैक नाम बरतिमाई छी। जब वील सुणौ कि यौ बाँट बे यीशु जाणई, तब वील धात लगैबेर कौ, "हे यीशु, दाउद रॉजक वंशक, मी पर तरस खा!" भौतै मैसोंल उकै डांटेबेर कौ, "चुप रौ!" पर उ

और लै जोरल धात लगैबेर कूण भैटौ, "ओ दाउदक वंशक यीशु, मि पर दया कर!"

और यीशुल रुकबेर कौ, "उकै यां ल्याओ।" और मैसौल काँण धें कौ, "धैर्ज धरिबेर उठ, उ तुकै बुलुणौ!" जब वील यस सुणौ, तब उ एकदम उठौ, और उ आपणि पंखि कैं खेड़िबेर यीशुक पास आ। यीशुल कौ, "मी तुमर लिजी के करुं?" काँणल कौ, "हे गुरुज्यू, मी देखण चानू!" यीशुल कौ, "तुमुल मी मिं विश्वास धरौ, यैक लिजी मी तुमुकैं ठिक करनू।" और उ बखतै बे उ देखण भैटौ और यीशुक दगाड़ जानै रौ।

## यरुशलेम मिं यीशुक स्वागत

(मरकुस ११:१-११)

जब यीशु और उनार शिष्य यरुशलेम बे थ्वाड़ पैली बैतनियाह गौं मिं पुजीं, तब यीशुल द्वी शिष्यों कैं यौ कैबेर भेजौ, "उ सामणीक गौं मिं जाओ। वां जान जानै तुमुकैं एक किल मिं बादि गधीक बच्च मिलल, जैमिं आइ तलक कवे नि बैठि रय। तुम उकैं खोलिबेर यां लाया। और अगर कवे कौल, "यकैं किलै ली जाणाछा?", तब तुम उधें कया कि हमर प्रभु कैं यैकि जरवत छु। उ यकैं जल्दी वापिस पुजवै द्याल।"

शिष्य न्है ग्याय और उनुल गधीक बच्च कैं सड़कक किनार पर एक घरक भ्यार बे बादि पा। जब उनुल उकैं खोलण लगा। तब वां ठाँड़ मैसौल पुछौ, "यौ के करणाछा, तुम यौ गधीक बच्च कैं किलै ली जाणाछा?" यीशुल उनुकैं जसै बतै राँखछी, शिष्योंल उं मैसों धें उस्सै कौ। तब उं मैसौल शिष्यों कैं जाण दे।

उं गधीक बच्च कैं यीशुक पास ली गई और वीमिं आपणि पंखि बिछै दे। फिर यीशु उ मिं भैटीं और इसिक यीशु यरुशलेम गई। तब भौतै मैसौल बाँट मिं आपण-आपण शौल और पंखि बिछै देई। और थ्वाड़ मैसौल गाड़ौन मिंबे हरी-हरी फाड़ काटिबेर बाँट मिं यीशुक स्वागतक लिजी बिछै देई।<sup>11</sup> और मैस यीशुक दगाड़ अधिल-पछिल हिटन-हिटनै चारों तरफ बे यौ जै-जैकार करणाछी, "धन्य छा तुम जो प्रभुक नामल उछा! जस हमर पुरखोंक राँज दाउद छी, उस्सै आँब तुम हमार राँज ह्वला! तुमेरि जै हो! स्वर्ग मिं परमेश्वरकि तारीफ हो!"

<sup>11</sup> यहूदी मैसौल यीशु कैं गधीक बच्च मिं भैटी देखिबेर जकर्याह नामक नबीक यौ शब्द जरुड याद आ हवाल। वील भौत बखत पैली भविष्यवाणी करिबेर बतै राँखछी, «ए यरुशलेमक मैसो, खुशि हो! देखो, तुमर राँज उणौ, धार्मिक और मुक्ति लिबेर, दयालु और गधीक बच्च मिं बैठिबेर!» ऐल यीशु यौ करिबेर दिखूणई कि उं साँचि मिं उं राँज और मुक्तिदाता छन जैक इतजार उं सब मैस करणाछी।

फिर यीशु यरुशलेम नगर में पुजी, और वां परमेश्वरक भवन में गई। वां सब कुछ भलि कै देखिबेर आपण बार शिष्योंक दगाड़ फिर वापिस रात बितूणक लिजी बैतनियाह गौं में आई।

## यीशु परमेश्वरक भवन बे ब्यापारियों कै निकालणई

(मरकुस ११:१२-१६)

दुसॉर दिन जब यीशु और उनार शिष्य बैतनियाह बे यरुशलेमक तरफ जाणाछी, तब बाँट में हिटन-हिटनै यीशु कै भूक लागी। तब थ्वाड़ दूर बे उं एक तिमुलक हरि-भरि बोट कै देखिबेर वीक पास आई कि शैद खाणिक लिजी के मिलि जाओ। यीशु बोटक पास गई पर उनुल वां पातोंक अलावा और के लै नी पाय, किलैकि ऐल फलक बखत नि छी। तब यीशुल कौ, "जा, आज बे तु में कभै फल नी लागो!"<sup>12</sup>

यैक बाद यीशु और उनार शिष्य यरुशलेम आई और यीशु परमेश्वरक भवन में गई। वां जो मैस पटाङण में भैबेर व्यापार करणाछी और भेट-बलिदान चढूणी समान कै बेचणाछी, यीशु उनुकें वांबे भ्यार निकालण भैटीं। और उनुल उनर मेजों कै खेड़ि दे, और कैकणी लै समान लिबेर परमेश्वरक घरक पटाङणक बाँट नी जाण देय। फिर यीशुल मैसों कै डाँटिबेर कौ, "धर्म-शास्त्र में यस लिख रॉखौ, "म्यर घर सब जातियोंक मैसोंक लिजी प्रार्थनाक घर कहलाई जॉल।" पर तुमुल यकें प्रार्थनाक घर नै बल्किन लुटेरोंक अड्ड बणै रॉखौ!"

यौ कारणल याजकोंक सैप और धर्म गुरुओंल यीशु कै मारणक बारि में उपाय सोचौ। उनुकें यीशु कै देखिबेर डर लै लागछी, किलैकि दुसॉर मैस दंग हबेर भौत खुशील यीशुक बात सुणनाछी।

और ब्याव बखत यीशु और शिष्य नगर है भ्यार बैतनिया गौं में वापिस जानै रई।

## विश्वासल सब कुछ है सकुं

(मरकुस ११:२०-२६)

जब दुसॉर दिन यीशु और शिष्य फिर यरुशलेमक बाँट जाणाछी, तब उनुल तिमुलक उ बोट कै फिर देखौ जकें यीशुल फिटकार दी रॉखछी,

<sup>12</sup> यीशुल उ तिमुलक बोट कै फिटकार दिबेर हमुकें यौ शिक्षा दे कि हमुकें आपण जीवन कै हरी बोटक चार केवल हरिये नि बडूण चैन बल्किन भॉल काम करिबेर उकें हर बखत फलदार लै हण चैं।

और उ भली कैबेर सुक गो छी। तब पतरसल यीशु धैं कौ, "गुरुज्यू, देखो, तिमुलक बोट जकैं तुमुल फिटकार दी रॉखछी, उ सुक गो!"

यीशुल जबाब दे, "ताज्जुब नि करो, लेकिन परमेश्वर मिं विश्वास धरो। मी तुमुधैं कूनू, जो लै विश्वासल यौ पहाड़ धैं कौल, उठ और समुद्र मिं गिर जा, और आपण मन मिं भैम नी करल बल्किन यौ विश्वास करल कि जो मी कूणयूं, उ है जॉल, तब वीक लिजी उस्सै है जॉल। यैक लिजी मी तुमुधैं कूनू कि जो तुम प्रार्थना मिं मांगछा, विश्वास करो कि उ तुमुकै मिलल, और उ तुमर लिजी है जॉल।"

और यीशुल फिर कौ, "जब तुम प्रार्थना करहुं तैय्यार हुंछा, तब उ बखत अगर कैलै लै तुमुहुं नक करि हो, तब पैली उकैं माफ करि दिया। फिर परमेश्वर लै तुमर कसूरों कैं माफ करॉल। लेकिन अगर हम दुसरोंक कसूरों कैं माफ नि करुंल, तब हमर पिता परमेश्वर लै हमर कसूरों कैं माफ नि करो।"

## धर्म गुरु यीशु कैं ललकारणई

(मरकुस ११:२७-३३)

फिर यीशु यरुशलेम मिं ऐबेर परमेश्वरक भवनक पटाडण मिं घुमणाछी। उ बखतै धर्म गुरु, याजकोंक सैप और प्रधान उनर पास आई। और उनुल यीशु धैं सवाल पुछौ, "जो तुमुल बेई यां ऐबेर करौ, उ किलै करौ और कैक कूणल तुम यौ काम करछा?"

तब उनुकैं जवाब दिणक लिजी यीशुल कौ, "मी लै तुमुधैं एक सवाल पुछनू, और अगर तुम मिकैं यैक जबाब द्यला, तब मी तुमुकैं बतूल कि मी कैक कूण मिं यौ काम करणयूं। आब तुम यौ बताओ कि यहूना कैक कूण मिं मैसों कैं पाणिक बपतिस्मा दिंछी - परमेश्वरक कूण मिं या मैसोंक कूण मिं? तुम मिकैं यैक जबाब दियो।"

तब उं मैस आपस मिं यौ बात करण भैटीं, "अगर हम कूनू, परमेश्वरक कूण मिं, तब यीशु कौल कि फिर तुमुल यहूना मिं विश्वास किलै नी धर। लेकिन अगर हम कूनू मैसोंक कूण मिं, तब मैस सुणिबेर रीश करॉल, किलैकि उं यहूना कैं परमेश्वरक सेवक समझछी।"

यैक लिजी उनुल यीशु धैं कौ, "हमुकैं पत्त न्हैं।" तब यीशुल कौ, "मी लै तुमुकैं नी बतूल कि मी कैक कूण मिं यौ काम करणयूं।"

## अधर्मी खेति कारोंक बारि मिं एक किस्स

(मरकुस १२:१-१२)

तब यीशुल धर्म गुरुओं कै यौ किस्स सुणा, "एक मैस छी जैल अंगूरक बगीच लगा। वील वीक चारों तरफ घेर-बाड़ करी और बीच मिं रस निकालणक जाँग बणै, और देखभाल करहुं पक्क छॉन बणा। तब उ बगीच कै लिखत करिबेर खेति करणियों कै दिबेर खुद दूर देश जानै रौ।

जब अंगूर पाकणक बखत आ, तब आपण हिस्स ल्युणक लिजी वील उनर पास एक नौकर भेजौ। लेकिन खेति कारोंल उ नौकर कै पकड़िबेर मारौ-थेचौ और खालि हात वापिस लगै दे।

यैक बाद अंगूरक मालिकल फिर दुसर नौकर कै भेजौ। बगीच मिं काम करणिवॉलोल वीक बेईजती करी और वीक ख्वर फोड़ि दे।

फिर मालिकल एक तिसर नौकर भेजौ, लेकिन उनुल उकै मारि दे। यैक बाद कतुकै नौकर आइ भेजी, खेति कारोंल थ्वाड़ों कै जान बे मारी दे और बकायों कै अधमरी बणै दे।

आँब वीक पास नौकर नि छी, केवल एक झणी बची छी, उ छी वीक च्यल, जकै उ भौतै प्यार करछी। और उं म्यर च्यलकि इज्जत करॉल कैबेर, उकै उनर पास भेजौ।

लेकिन जब यौ च्यल खेतिकारोंक पास पुजौ, तब उनुल आपस मिं यौ सांठ-गांठ करी, "आओ, हम यकै जान बे मारी दिंनू! असली वारिस यै छु, फिर यौ सब जैजाद हमेरि है जालि!" तब उनुल उकै पकड़िबेर मारी दे और वीक लाश कै उठैबेर बगीचक घेर है भ्यार खेड़ि दे।"

तब यीशुल धर्म गुरुओं धैं पुछौ, "तुमर विचारल जब बगीचक मालिक आल, तब उ के करल? उ खेतिकारों कै जरूड़ मारिबेर आपण बगीच दुसर खेतिकारों कै सौंप द्यल! किलै तुमुल धर्म-शास्त्र मिं नी पढ़ा,

“जो ढुड कै मिस्त्रियोंल बेकार जाणिबेर खेड़ि दे, वी ढुड मकानक सबन हबेर खाश ढुड बणौ।

यौ काम परमेश्वरक छु और हमर देखण मिं बड़ अद्भुत छु।”

धर्म गुरु यौ भली कैबेर समझि ग्याय कि यीशुल यौ किस्स हमरै बारि मिं कौ। यैक लिजी उं यीशु कै पकड़ण चांछी, लेकिन मैसोकि डरक कारणल उं उ बखत यीशु कै छोड़िबेर जानै रई।

## धर्म गुरु यीशु कै फसूण चांछी

(मरकुस १२:१३-१७)

थ्वाड़ धर्म गुरु और राजपाल हैरोदेसक दलक मैस यीशुक पास आई, किलैकि यहूदी नेताओंल उनुकें यीशुक इमतिहान लिणक लिजी भेजि राँखछी। यैक लिजी उं ऐबेर यीशु धैं बुलाणी, "गुरुज्यू, हम यौ जाणनू कि तुम सांचि छा। तुम कैकि परवा लै नि करना, और कैकि मूख देखि बात लै नि करना बल्किन सच्चाईल परमेश्वरक बाँटक उपदेश दिंछा। यैक लिजी ऐल हमुकें बताओ, के परमेश्वरक नीमोंक अनुसार रोमी शासक कै चुंगी दिण भल छु या न्हैं?"

लेकिन यीशुल उनर छल कपट कै भांपिबेर कौ, "मेरि परीक्षा किलै लिंछा? एक सिक्क ल्याओ और मिंके दिखाओ।" तब उं एक सिक्क ल्याई। यीशुल उनुधैं पुछौ, "यौ सिक्क मिं कैकि मूख और कैक नाम छु?" उनुल जबाब दे, "रोमी शासकक।" इतुक मिं यीशुल उनुधैं कौ, "जो शासकक छु उकें शासक कै दियो, और जो परमेश्वरक छु उकें परमेश्वर कै दियो।" यौ बात सुणिबेर कि यीशु हमेरि चाल मिं नि फस उं मैस दंग है पड़ीं।

## दुबार ज्यून हुणकि बात

(मरकुस १२:१८-२७)

फिर सद्की दलक धर्म गुरु जो मानछी कि मरणक बाद जीवन न्हैं, उनुल यीशुक पास ऐबेर उनुधैं यौ सवाल पुछौ, "गुरुज्यू, मोशेशल हमर लिजी यौ नीम बगै राँखछी कि अगर कैकै भै आपण घरवाइक रुण तलक बिना औलादक मरि जांछौ, तब वीक भै उ विध्वाक दगाड़ ब्या करिबेर आपण भैकि लिजी औलाद पैद करि सको, जैल वीक वंश अघिल कै बढ़ सको। ऐल यौ बात कै सुणो। सात भै छी और पैली वॉलक ब्या हौ, लेकिन उ बिन औलादक मरि गोय। फिर दुसर भैल उ विध्वाक दगाड़ ब्या करौ, और उ लै बगैर औलादक मरि गोय। फिर तिसरल, और वीक दगाड़ लै यस्सै हौ। और इसिकै सातू भै बिन औलादक मरि ग्याय, और वीक बाद उ स्वैणि लै मरि गई। जब उं परमेश्वरक न्याय करणक दिन मिं फिर ज्यून ह्वाल, तब उ स्वैणि कैकि घरवाइ ह्वेलि? किलैकि उ तो सातू भैनोंकि घरवाइ रई छी।"

तब यीशुल उनुधैं कौ, "तुमर दिमाग ठिक छा या न्हैं? नै तो तुम धर्म-शास्त्र कै जाणछा और नै परमेश्वरक सामर्थ कै। किलैकि जब मैस उ दिन

ज्यून ह्वाल, तब उं ब्या नि करॉल और न आपणि चेलि कै ब्याक लिजी द्याल, बल्किन यौ मामुल मिं उं स्वर्गदूतोंक चारि ह्वाल जो ब्या नि करन।

यैक अलावा तुम यौ बात नी मानना कि मैस मरिबेर फिर ज्यून है जॉल, लेकिन धर्म-शास्त्र मिं मोशेशक बारि मिं लिख रॉखौ कि जब वीक दगाड़ परमेश्वरल ऑगक झाड़ि बे बात करी, उनुल कौ कि मी त्यार पुरखा इब्राहीम, इसहाक और याकूबक परमेश्वर छूं। अगर परमेश्वर आइ तलक हमर पुरखोंक परमेश्वर छु, जब कि उं भौतै पैली मरि गई, यैल तो साफ है जां कि उं दुबार फिर ज्यून ह्वाल। किलैकि परमेश्वर मरियोंक नै बल्किन ज्यूनोक परमेश्वर छु। अगर तुम सोचछा कि मरी मैस दुबार ज्यून नि हुंन, तब तुम आइ तलक के नि समझा।"

## सबों है ठुल हुकुम

(मरकुस १२:२८-३४)

जब एक धर्म गुरु यौ बातों कै सुणनौछी तब वील समझौ कि यीशुल सदूकियों कै सही जबाब दे। यैक लिजी उ अधिल बढौ और वील यीशु धैं पुछौ, "गुरुज्यू, मिंके बताओ, सबों हबेर ठुल हुकुम के छु?"

यीशुल कौ, "पैल हुकुम यौ छु- हे इस्रायली मैसो, सुणो, हमर एक परमेश्वर छु और उं हमर प्रभु छु। हमुल आपण परमेश्वर कै आपण पुर मनल, पुर ताकत और पुर बुद्धिल प्रेम करण चैं। दुसर हुकुम यौ छु- जस प्रेम हम आपण दगाड़ करनू, उस्सै प्रेम हमुकै आपण पड़ोसीक दगाड़ लै करण चैं। यौ द्विनो हबेर ठुल और कवे लै हुकुम न्हैं।"

तब धर्म गुरुल यीशु धैं कौ, "हे गुरुज्यू, कतुक भलि बात छु। तुमुल सांचि कौ कि एक्के परमेश्वर छु, उनर अलावा और कवे परमेश्वर न्हैं। और हमुल उनुकै आपण पुर मनल प्रेम करण चैं, और जस प्रेम हम आपण दगाड़ करनू, उस्सै प्रेम हमुकै आपण पड़ोसीक दगाड़ लै करण चैं। और यौ हर किसमक बलिदान और भेट चढूण हबेर जादे जरूडी छु।"

जब यीशुल देखौ कि उ ठिक कूणौ, तब उनुल उधैं कौ, "तुम परमेश्वरक बॉट बे दूर न्हैंता।"

और यैक बाद कैकणी लै और कवे यस सवाल यीशु धैं पुछणक हिम्मत नि हई, जैल उं यीशु कै फसूणक इरॉद मिं सफल हो।

## दिखाव नि करण चैं

(मरकुस १२:३७-४४)

फिर भौतै मैस यीशुक पास ऐबेर उनेरि बात खुशि हबेर सुणनाछी। यीशुल उपदेश दिबेर कौ, "तुम यौ धर्म गुरुओंक जस झन हया, किलैकि यौ लम्ब कुर्त पैरिबेर इथकै-उथकै घुमनी और बजार मिं मैस उनुकें नमस्कार करो, यौ इनुकें भल लागुं। सभा-घरों मिं अघिल बे बैठण, और न्यूत-पातों मिं आदरक जांग मिं बैठण, यौ सब उनुकें भल लागुं। लेकिन यौ ठगबेर विध्वाओंक सब जैजाद खुद ली लिंगी और फिर मैसों कें दिखूणक लिजी देर तलक दुआ करनी! लेकिन यौ सब कामोंक बदाव इनुकें परमेश्वर भौत ठुलि सजा द्याल।"

फिर यीशु परमेश्वरक घर मिं जतिकै दानपात्र धरी छी उतीकै बैठि राछी और दान दिणी मैसों कें देखणाछी। भौतै सेठ मैस जादे-जादे दान दिणाछी। तब एक विध्वाल ऐबेर द्वी नॉन डबल दानपात्र मिं खितीं। यौ देखिबेर यीशुल आपण शिष्यों कें बुलैबेर कौ, "मी तुमुधैं सांचि कूंन कि दान दिणिवाँलों मिं सबों हबेर जादे यौ विध्वाल दे। किलैकि सबुलै आपणि जादे कमाइ मिंबे थ्वाडै दे, लेकिन यैल आपणि गरीबी मिं लै यैक पास जतुक छी सबै दी दे, और आपण लिजी के नि बचाय।"

## यीशु उणिवाँल मुशीबतक बारि मिं बतूणई

(मरकुस १३:१-१३)

यैक बाद जब यीशु परमेश्वरक भवन बे जाणौछी तब उनर एक शिष्यल कौ, "गुरुज्यू, देखो, परमेश्वरक भवन और दुसॉर कुड कतुक भल देखीनी और इनार दुड कतुक ठुल छन!" यीशुल कौ, "होई, यौ भौतै भॉल छन, लेकिन फिर लै यौ सब खतम है जॉल और तब एक लै दुड ठाँड़ नि मिलल।"

यैक बाद उं सामणीक डॉन मिं गेई, और एकांत मिं जैबेर पतरस, याकूब, यहूना और अन्द्रियासल यीशु धैं पुछौ, "जो तुमुल परमेश्वरक भवनक बारि मिं कौछी, यौ कब ह्वल?" यौ कसिक पत्त चलल कि यौ हुणिवाँल छु?"

यीशुल कौ, "सावधान रओ कि तुम कै कै बहकाव मिं नि आओ। किलैकि भौतै मैस तुमर पास आल और कौल कि मी मुर्कतिदाता छूं, और तब भौतै मैस उनर बहकाव मिं ऐ जॉल। जब तुम लडै-झगड़ोकि खबर सुणला, तब तुम डरिया झन, किलैकि पैली यस हुण जरूड़ी छु, लेकिन उ बखत दुनियाँक

अंत जल्दी नि हो। जातिक विरोध जाति, राज्यक विरोध राज ठाँड़ उठाल। अनेक जाँगों मिं ठुला-ठुल भूचाल आल और जां तां अकाल पड़ॉल। पर यौ केवल मैसोंक दुःख पीड़कि शुरुवाद ह्वेलि।"

यीशुल फिर कौ, "तुम सावधान रओ, किलैकि मैस तुमर विरोध मिं ह्वाल और तुमुकै न्यायालय मिं सौप द्याल, तुमुकै सभा मिं लिजैबेर हन्टर मारॉल और उं म्यर कारणल तुमुकै रॉजोंक सामण लै ठाँड़ करॉल। और परमेश्वर यौ हुण द्याल, किलैकि यैल तुम म्यर बारि मिं गवाही द्यला। किलैकि यौ जरूड़ी छु कि दुनियाँक अंत है पैली सब जातियों कैं मेरि भलि खबर सुणाई जाओ।

जब मैस यैक लिजी कि तुम म्यर शिष्य छा कैबेर, तुमुकै पकड़िबेर न्यायालय मिं ली जाँल, तब यौ बातक फिकर झन करिया कि तुम के कौला, किलैकि उ बखत पवित्र आत्मा तुमुकै बताल कि तुमुल के कूण छु।



परमेश्वरक भवन

सब मैस तुमुधैं बैर करॉल, किलैकि तुम म्यर शिष्य छा। भै आपण भै कैं, और बाब आपण च्यल कैं मारणक लिजी दी द्याल, और नॉनतिन आपण इज-बौज्यू कैं मरवै द्याल। लेकिन जो आखिर तलक मी मिं भरोस धरॉल, वी बचाई जाँल।" <sup>13</sup>

## दुनियाँक अंत हुणक निशाण

(मरकुस १३:१४-३७)

यीशुल फिर कौ, "उ बखत एक दुष्ट मैस परमेश्वरक भवन मिं जैबेर उकैं अशुद्ध करल, जैक वील परमेश्वर आपण घर कैं छोड़ि द्याल।

उ बखत जो मैस यहूदा प्रदेश मिं ह्वाल, उं भाजिबेर डॉनों मिं न्है जाया। और जो पाँख मिं ह्वाल, उं मैस आपण के समान कैं ल्युणक लिजी भितेर

<sup>13</sup> यीशुक परमेश्वरक यौ परचार करणक लगभग सैंतीस सालक बाद रोमियोंक सेनाओंल पुर यरुशलम नगर और परमेश्वरक भवन कैं नाश करि दे। यीशुक भविष्यवाणी एक बार उ बखत पुर है और फिर दुबार उ बखत पुर ह्वेलि जब उं यौ दुनी मिं फिर सबनक न्याय करणक लिजी वापिस आल।

झन जाया, पर वांबे भाजि जाया। और जो गाँड़ों में ह्वाल, उं भाजिबेर आपण पंखि ल्युणक लिजी पछिल घर नि लौटिया।

उं स्यैणियोंक लिजी जो उ बखत अड-भारि ह्वाल और उनर लिजी जो नॉनतिनों कै दूध पिलुनी, उ बखत उनर लिजी कतुक दुःखक बखत ह्वल!

प्रार्थना करौ कि यौ सब चौमासक दिनों में झन हो! किलैकि उ दिनों यस दुःख पीड़ ह्वेलि, जस परमेश्वरक दुनियाँक शुरुवाद करी बे आज तलक न है और न कभै ह्वेलि। अगर परमेश्वरल उं दिनों कै घटाई नि हुछियौ, तब क्वे लै प्राणि नि बचछी। लेकिन उनुल आपण चुनी मैसोंक कारणल उं दिनों कै घटै हैछी।"

यीशुल फिर बता, "दुनियाँक अंत है पैली मैस तुमुधैं यस कौल, "देखो, हमर मुक्तिदाता यां छु, या वां छु," लेकिन तुम उनुमिं भरोस झन करिया। किलैकि यॉस मैस आल जो कौल कि मी मुक्तिदाता छूं, या मि परमेश्वरक दूत छूं, लेकिन तुम उनुमिं विश्वास नि करिया। और उं अद्भुत काम लै दिखैबेर परमेश्वरक चुनी मैसों कै बहकाल, पर उं सफल नि ह्वाल। यैक लिजी तुम सचेत रया, किलैकि मील तुमुकैं बतै हैलौ कि दुनियाँक अंत है पैली के-के ह्वल।

और यस ह्वल जस नबी योएलेल कै रॉखौ, "उ बखत यौ दुःख-पीड़क बाद सूर्ज अन्यार पट्ट है जॉल, और जूनक उज्याव लै मिटि जॉल।

अगाश बे तॉर छुटण लागॉल और पुर ब्राहमांडु कै झिझौडी जॉल।"

और मी जो परमेश्वरक तरफ बटी ऐ रयूं, सब मैस मिक्कें सामर्थक और महिमाक दगाडु बादोव मिं उण देखॉल। और मी आपण स्वर्गदूतों कै भेजिबेर दुनियाँक चारों तरफक दिशाओं बे आपण चुनी मैसों कै जॉम करवूल।

फिर यीशुल शिष्यों धैं कौ, "एक तिमुलक बोट कै देखो और ये देखिबेर सिखि लियो। जसिकै वीक फांग मुलायम है जानी और उनुमिं नई नई कल्ल लागण भैटनी, तब तुम समझि जांछा कि गरमीक रितु नजिक छु, इसिकै जब तुम यौ सब बातों कै हुण देखला जो मील तुमुकैं बताछी, तब जाण लिया कि मी नजिक छूं बल्किन द्वारै पर छूं। मी तुमुधैं सांचि कूंनू कि यौ पुशतक अंत तब तलक नी ह्वल, जब तलक यौ सब पुर नि है जाओ। यौ अगाश और धरति लै खतम है जालि, पर म्यर बचन कभै खतम नि ह्वल, उ हमेशा तलक सांचि रौल।"

यीशुल फिर कौ, "केवल पिता परमेश्वर जाणनी कि मी धरति मिं कब वापिस ऊल और मी उनर पुत्र लै यैक बारि मिं के नि जाणन, और नै क्वे स्वर्गदूत जाणनी।

सचेत रया और सितया इन किलैकि तुम नि जाणना कि उ बखत कब आल। यस छु जसिकै कवे मैस आपण घर छोड़िबेर विदेश नहै जां। उ आपण घरक भार आपण दासों कै सौंप जां और हरेक कै उनर काम बतै जां, और चौकदार कै बिज्जै रुणक हुकुम दी जां।

तब तुम लै उं दासोंक जस आपण आँखों कै खुल धरिया और मी जो तुमर प्रभु छूं, म्यर इंतजार करिया किलैकि तुम नी जाणना कि मी स्वर्ग जैबेर दिन-रात कब वापिस ऊंल। यैक लिजी तुम बिज्जै रओ, किलैकि कै यस नि हो कि मी अचानक ऐ जूं और तुमुकै सिती पाऊं।

जो बात मील तुमुधैं कै राँखछी वी फिर मी सबों धैं कूनु, कि सितया इन बिज्जै रया।"

## एक स्यैणि यीशु मिं इत्र लगूणै

(मरकुस १४:१-११)

उ बखत यहूदी मैस आपण पुरखोंक मिस्रियोंकि गुलामी बे आजाद हुणक यादगारी मिं एक त्यार मनाई करछी। जब त्यारक द्वी दिन बचि राछी, तब याजकोंक सैप और धर्म गुरु यीशु कै चुप-चापल पकड़िबेर उकै मारणक तरकीब सोचण भैटीं। फिर लै उं यस कूछी कि त्यारक दिनों मिं नै, किलैकि कै यस नि हो कि मैस हमर दगाड़ झगड़-फसाद करो। किलैकि भौत मैस यीशु कै भल मानछी।

उ बखत जब यीशु बैतनिया गों मिं आपण शिष्योंक दगाड़ कैकै घर मिं खाँण खाणाछी, तब एक स्यैणि भौत महंग इत्र लिबेर वां ऐ। और वील उ सब यीशुक ख्वर मिं आपण प्रेम कै जतूणक लिजी खित दे।

लेकिन जो मैस वां छी उनुमिं बे थ्वाड़ मैस यौ कूण भैटीं, "यैल यौ इत्र कै बरबाद किलै करौ? यौ इत्र भौतै अनमोल छी और यकै बेचिबेर उं डबलों कै गरीबों मिं बाटि जै सकछी।" और उनुल यौ कैबेर उ स्यैणि कै डांटौ।

लेकिन यीशुल उनुधैं कौ, "तुम यकै परेशान किलै करणाछा? यकै छोड़ि दियो, किलैकि यैल म्यर लिजी भल काम करि राँखौ। गरीब तो तुमर दगाड़ हमेशा रूनी। जब लै तुम चाला तुम उनेरि मधत करि सकछा, पर मी तुमर दगाड़ हमेशा नि रूँल। जो लै यौ करि सकछी यैल वी करौ। वील म्यर मरण हबेर पैलियै मिंके दफनूणक लिजी म्यर आड मिं खुशबु लगै है। मी तुमुधैं साँचि कूनु, साँर दुनी मिं जां लै मेरि भलि खबर सुणाई जालि, वां यैक याद मिं जो लै यैल करौ यैक जिकर जरूड़ हवल!"

तब यौ देखिबेर युदस इस्करोती जो उनार बारि शिष्यों मिंबे एक छी, उ याजकोंक सैपोंक पास गो और यीशु कैं पकड़ै दिणक वैद करि आ। उं यौ बात सुणिबेर खुशि हई और उनुल उकैं धन दिणक वैद करौ। और युदस यीशु कैं पकड़णक मौक मिं लागि गोय।

## शिष्य त्यारक तैय्यारी करणई

(मरकुस १४:१२-१६)

त्यारक पैलि दिन, जब एक भेड़क नानू-नॉन झै बोककी चढ़ाई जांछी, उ वीकि तैय्यारीक लिजी शिष्योंल यीशु धैं पुछौ, "हम कां जैबेर त्यार खाँणक लिजी तैय्यारी करनू?"

तब यीशुल द्वी शिष्यों कैं यौ कैबेर भेजौ, "यरुशलेम नगर मिं जाओ। वां तुमुकैं एक मैस मिलल जो एक पाणिल भरी घड़ कैं ली जाणौ हवल, तुम वीक पछिल-पछिल जाया। जो घर भितेर उ जॉल, उ घरक मालिक धैं तुम यस कया कि गुरुज्यूल पुछवै राँखौ कि म्यर लिजी उ जॉग कां छु, जां मी आपण शिष्योंक दगाड़ त्यार खूल? और उ तुमुकैं वैं मलि एक सजी-सजायी कम्म दिखाल। तुम वैं हम सबनक लिजी त्यार खाणकि तैय्यारी करिया।" यौ सुणिबेर शिष्य न्है गयाय और जस्सै यीशुल उनुधैं कैं राँखछी उनुल यरुशलेम नगर मिं जैबेर सब चीज ठिक उस्सै पा। और उनुल वां त्यार खाँणक लिजी तैय्यारी करी।

## यीशु और शिष्य त्यार मनूणई

(मरकुस १४:१७-३१)

जब ब्याव हुण भैटीं तब यीशु आपण बार शिष्योंक दगाड़ उ घर मिं पुजीं जां त्यार खाँणक लिजी तैय्यारी करि राँखछी। और जब उं खाँण खाणाछी, तब यीशुल उनुधैं कौ, "तुम सब म्यर दगाड़ खाणाछा, लेकिन मी सांचि कूनु कि तुमुमिं एक यस छु जो मिक्कैं पकड़वाल।" यीशुकि यौ बात सुणिबेर शिष्य उदास है पड़ीं और एक-एक कैबेर उधैं पुछण भैटीं कि कैं उ मी तो न्हैतियूं? यीशुल जबाब दे, "सांचि मिं तुम सबों मिंबे एक मिक्कैं पकड़वाल, जो ऐल म्यर दगाड़ खाँण खाणाछा। मी जो परमेश्वरक तरफ बे ऐ रयूं म्यर हाल तो उस्सै हवल, जस्सै म्यर बारि मिं लेखि राँखौ, लेकिन लानत छु उ मैसक लिजी जो मिक्कैं पकड़वाल। यौ हबेर भल वीक लिजी यौ छी कि उ मैस पैदै

नि हुंछी।" जब उं खॉण खाणाछी उ बखत यीशुल र्वट पकड़ौ और आशीश मांगिबेर ट्वडौ और आपण शिष्यों कैं दिबेर कौ, "लियो, यौ र्वट छु जकैं तुम म्यर आड समझिबेर खाया।" फिर उनुल ब्याल कैं टिपिबेर परमेश्वर कैं धन्यवाद दिबेर उकैं शिष्यों कैं दे और सबोलै वी मिंबे बारि-बारिल पे। उनुल कौ, "तुम जो यौ अंगूरक लाल रस पिणाछा यकैं म्यर खून समझया जकैं मी भौतै मैसोंक जान कैं बचूणक लिजी बगूणिवाल छूं। किलैकि मेरि मौतल परमेश्वर मैसोंक दगाड़ आपण एक नई वैद कैं साबित करणई। मी तुमुधैं सांचि कूंन कि मी अंगूरक रस तब तलक दुबार कभै नि प्यूं, जब तलक कि मि परमेश्वरक राज मिं जैबेर नि पी ल्यूं।"

तब भजन गाणक बाद यीशु और उनार शिष्य जैतून नामक डॉन मिं जाने रई।

हिटन-हिटनै यीशुल आपण शिष्यों धैं कौ, "तुम सबनक विश्वास लै जाने रौल, किलैकि धर्म-शास्त्र मिं यस लेखि रॉखौ कि मी ग्वाव कैं मारि द्यूल और भेड़ इथां-उथां भटक जॉल। लेकिन ज्यून करी जाणक बाद मी तुम सबन है पैली गलील प्रदेश हुं जूल।"

पतरसल यीशु धैं कौ, "गुरुज्यू, तुमुल कौ कि हम सबोक विश्वास जाने रौल। और सबनक विश्वास जॉलत-जॉल, लेकिन म्यर विश्वास कतई नि जाओ!" यौ सुणिबेर यीशुल उधैं कौ, "मी तुधैं सांचि कूंन कि आज रात मुर्गक द्वी बारि बांक दिण हबेर पैली, तु तीन बारि आपण मुखल म्यर इन्कार करलै।" लेकिन पतरसल और लै जादे जोर दिबेर कौ, "चाहे मिक्कैं तुमर दगाड़ मरण लै पड़लौ, तब लै मी तुमर इन्कार कतई नि करूं।" और सबनल लै यस्सै कौ।

## यीशु दुःखी हबेर प्रार्थना करणई

(मरकुस १४:३२-४२)

यीशु और शिष्य गतसमनी नामक बगीच मिं आई। यीशुल आपण शिष्यों धैं कौ, "जब तलक मी प्रार्थना करनू, तुम यां ठैरो।"

यीशु पतरस, याकूब और यहूना कैं आपण दगाड़ ली गो। उ बखत यीशु भौतै उदास और घबरै राछी। उनुल शिष्यों धैं कौ, "मी इतुक जादे दुःखी छूं कि मिक्कैं यस लागणौ कि म्यर प्राण जाणि छन। यैक लिजी तुम यां ठैरिया और सितिया ज्ञन।"

उं थ्वाड़ अधिल गेई और भी मिं लफाईबेर प्रार्थना करण भैटीं कि अगर है सको तब यौ मुशीबत म्यर सामण बे टलि जाओ। उनुल कौ, "ओ बौज्यू, तुमर लिजी के लै मुशिकल न्हैं। यौ दुःख-मुशीबतकि असहनीय घड़ि कै मी हबेर दूर करि दियो। फिर लै मेरि नै, बल्किन तुमेरि मंशा पुरि हो।"

फिर यीशु आपण शिष्योंक पास वापिस आई और उनुल उनुकें सिती देखिबेर पतरस धैं कौ, "हे शिमोन पतरस, के तु से रौछै? किलै तु घंटभर लै बिज्जै नी रै सक छियै? तुम सबै बिज्जै रैबेर प्रार्थना करो कि तुम इम्तिहान मिं नि पड़ो। तुमेरि आत्मा तो भल करणक लिजी तैय्यार छु, लेकिन तुमर पास यौ शक्ति न्हैं कि तुम आत्माक बात कै पुर करि सको।"

उनुल फिर जैबेर दुबार वी प्रार्थना करी जो उनुल पैली करछी। वापिस उण पर उनुल आपण शिष्यों कै आइ सितियै पा किलैकि उनेरि आँखों मिं नीन भरि छी। उठिबेर शिष्योंक समझ मिं यौ नि आइ कि उं यीशु कै के जबाब दियो।

यीशु जब तिसर बारि शिष्योंक पास आई, तब उनुल उनुधैं कौ, "आइ तलक सितियै छा और आरामै करणाछा? बस, आँब भौत है गो। उ बखत ऐ गो कि मी जो परमेश्वरक तरफ बटी ऐ रयूं पापियोंक हात पकड़ाई जाणयूं। उठो, हम हिटनू, किलैकि म्यर पकड़ुणिवॉल नजिक ऐ गो।"

## यीशु पकड़ी जाणौ

(मरकुस १४:४३-५०)

जब यीशु यस कूणाछी, उ बखतै युदस इस्करोती वां आ। वीक दगाड़ जांठ-तलवार लिबेर एक भीड़ लै छी, जनुकें याजकोंक सैपोल, धर्म गुरुओल और प्रधानोंल भेजि रॉखछी। युदसल उनुकें यौ बतै रॉखछी कि जकै मी अडाव खितूल, वी यीशु हवल। तुम उकै पकड़िबेर भलीकै ली जाया। युदसल सिद्द यीशुक पास जैबेर कौ, "गुरुज्यू!" और वील उनुकें अडाव खितौ। यीशुक दगडुवॉल यौ देखिबेर कि के हुणिवॉल छु, उनुधैं कौ, "प्रभु! के हम इनुमिं हम्मल करनू?" और उनुमिंबे एकल महायाजकक नौकरक कान एक ठुल छुरल उडै दे, पर यीशुल कौ, "ना, ना, भौत है गो।" और उनुल वीक कान छुबेर भल करि दे। फिर यीशुल भीड़ धैं कौ, "मील के कसूर करि रॉखौ कि तुम मिंके पकड़णक लिजी जांठ-तलवार लिबेर ऐ राछा? जब मी रोज परमेश्वरक भवन मिं उपदेश दिनै तुमर दगाड़ छी, तब तुमुल मिंके नी पकड़। पर आँब यौ यैक लिजी हुणौ कि परमेश्वरक बचन

पुर हो।" तब उनुल यीशु कै पकड़िबेर आपण कब्ज मिं करि ले। पर उनार शिष्य उनुकै छोड़िबेर भाजि पड़ीं।

## यीशु यहूदी न्यायालयक सामण

(मरकुस १४:५३-६५)

उं यीशु कै महायाजकक पास ली गई। वां दुसॉर याजकोक सैप, धर्म गुरु और प्रधान पैली बटी जाँम छी।

यीशु है थ्वाड़ दूर-दूर रैबेर पतरस महायाजकक दरबारक पटाङ्गण तलक गो और वां चौकदारोंक दगाड़ भैबेर आँग तापण भैटौ।

महायाजक और सॉर यहूदी न्यायालयक सदस्य यीशु कै मरूणक विचारल उनर खिलाफ गवाहीक तलाश मिं लागि राछी, पर उ नि मिलि। भौतै मैसॉल तो उनर खिलाफ झुटि गवाही लै दे पर उनार बयान आपस मिं मेल नि खाणाछी।

तब थ्वाड़ मैस उठीं और उनुल यीशुक खिलाफ यौ झुटि गवाहि दे, "हमुल यौ मैस कै यस कूण सुणि रॉखौ कि मी यौ हातक बणाई परमेश्वरक भवन कै उधारिबेर तीन दिनक भितेर यैक बदाव एक दुसर भवन बणै द्यूंल जो कि हातल बणि नि हो।" लेकिन यौ बातोंक बारि मिं लै उनार बयान एक-दुसरक दगाड़ नि मिलणाछी।

वीक बाद महायाजकल ठाँड़ हबेर यीशु धें पुछौ, "यौ तुमर विरोध मिं जो गवाही दिणई, के त्यर पास यैक क्वे जबाब न्हाति?" पर यीशु चुप रई और उनुल के नि कौय। फिर महायाजकल यीशु धें पुछौ, "के तु सांचि मिं मुक्तिदाता और परम आराध्य परमेश्वरक च्यल छै?" यीशुल जबाब दे, "होई, मी वी छूं। और तुम मिंके सर्व शक्तिमान परमेश्वरक दैण तरफ भैटी और बादोवों मिं दुबार उण देखला।"

यौ सुणिबेर महायाजकल रीशल आपण आडक लुकुड़ फाड़िबेर कौ, "आब हमुकै और क्वे लै गवाहीक के जरूवत न्है। हमुल खुद परमेश्वरक बुराइ आपण कानोंल सुणि है। आब बताओ कि तुम सबोंकि यैक बारि मिं के राय छु?" तब उं सबोंक यौ फैसॉल हौ कि यीशु कै प्राण दंड मिलण चैं।

तब थ्वाड़ मैस यीशु मिं थुकुण, उनर आँखों मिं पट्टी बादिबेर उकै घुस्स मारण, और पुछण लागीं कि बता, तुकै कैल मारौ? और सिपैनोंल लै यीशु कै थप्पड़ मारीं।

## पतरसक यीशुक इन्कार

(मरकुस १४:६६-७२)

यौ बीचै जब पतरस पटाङण मिं बैठि रौछी, जब महायाजककि एक नौकराणि वां ऐ। जब वील पतरस कैं वां आंग तापण देखौ, तब भौत ध्यानल उकै देखिबेर कौ, "तु लै तो उ नासरत गौक यीशुक दगडु छै।" यौ सुणिबेर पतरसल कौ, "मी नी जाणन कि तु के कूणैछै।" यौ कून-कूनी पतरस द्वार तलक पुजि रौछी, तब उभतै मुर्गल बांक दे। यैक थ्वाड़ देर बाद जब उ नौकराणिल पतरस कैं दुबार वां देखौ, तब वील फिर कौ, "यौ मैस लै उनुमिं बे एक छु।" पतरसल दुबार फिर यीशुक इन्कार करिबेर कौ, "नै, नै मी यौ मैसक दगाड़ तो दूर यकै जाणन लै न्हैतियू।"

तब थ्वाड़ देर बाद वां ठाँड़ हई मैसोल पतरस धैं कौ, "यौ बात पक्कि छु कि तु लै यीशुक दगडुवाँ मिंबे एक छै, किलैकि तु लै गलीली छै। यैक अंताज हमुल तेरि भाषा बे लगै है।"

वीक बाद पतरस उनर सामण परमेश्वरक यौ कसम खाँण भैटौ, "मी उ मैस कैं नि जाणन जैक बारि मिं तुम कूणाछा!" उभतै मुर्गल दुसर बारि बांक दे। तब पतरस कैं यौ बात याद ऐ जो यीशुल उधैं कै रौखछी कि आज मुर्गक द्वी बारि बांक दिण है पैली तु म्यर तीन बारि इन्कार करलै। तब पतरस कैं भौतै दुःख हौ कि मील यौ के करौ, और उ जोर-जोरल डाड़ मारण लागौ।

## यीशु राजपालक सामण

(मरकुस १५:१-२०)

जस्सै रात्ति है तब न्यायालयॉक मैस आपस मिं बात करण भैटीं कि हम यीशु मिं दोष कसिक लगै सकनू। तब उं उनुकैं बादिबेर रोमी राजपाल पिलातुसक पास ली गई और उनुल उकैं बता, "यौ आपुं कैं यहूदियोंक रॉज बतूणौ!" तब पिलातुसल यीशु धैं पुछौ, "के तु यहूदियोंक रॉज छै?" यीशुल कौ, "जस तुम कूणाछा, यस्सै छु।" फिर याजकोंक सैपोल यीशु मिं भौतै जादे झुट दोष लगाई।

तब पिलातुसल यीशु धैं कौ, "तु जबाब किलै नि दिणयै? देख, यौ कतुक बातोंक बारि मिं तु मिं दोष लगूणई!" फिर लै यीशुल उकैं के जबाब नि देय। यौ देखिबेर पिलातुस कैं बड़ ताज्जुब हौ।

हर फसहक त्यारक मौक मिं पिलातुस एक कैदी कैं उनर लिजी छोड़ि दिंछी। ऐल बरअब्बा नामक एक कैदी दंग-फसाद करणी मैसोंक दगाड़

कैदखाण मि बन्द छी जैल दंग फसाद मि खून करि रॉखछी। तब मैस पिलातुसक पास आई और उधैं विनती करिबेर कूण लागीं, "जस्सै तुमुल आज तलक हमर लिजी करि रॉखौ, उस्सै आइ लै करो।" पिलातुसल उनुधैं पुछौ, "तुम के चांछा कि मी तुमर लिजी यीशु जकैं तुम यहूदियोंक रॉज कूछा, उकैं छोड़ि दियूं?" पिलातुसल यस यैक लिजी कौ किलैकि उ जाणछी कि याजकोंक सैपॉल चिढ़बेर यीशु कैं पकड़ै रॉखछी।

लेकिन याजकोंक सैपॉल मैसों कैं भड़कै रॉखछी कि यीशु कैं न, पर बरअब्बा कैं हमर लिजी छोड़ि दियो, और सब मैसोंल यस्सै कौ। यौ सुणिबेर फिर पिलातुसल बात करिबेर उनुधैं पुछौ, "जकैं तुम यहूदियोंक रॉज कूछा, वीक मी के करूं? बताओ, तुम के चांछा?" उनुल चिलैबेर कौ, "उकैं मारणक लिजी सूली मिं टांकि दियो!" तब पिलातुसल उनुधैं पुछौ, "किलै, यैल के गलती करि रॉखी?" लेकिन मैसोंल और लै जादे जोरल चिल्लाट पाड़िबेर कौ, "उकैं सूली मिं टांकि दियो!"

पिलातुस भीड़ कैं खुशि करण चांछी और यैक लिजी वील बरअब्बा कैं उनर लिजी छोड़ि दे। और यीशु कैं हन्टरैकि अत्था मार लगवैबेर सूली मिं चणूढ़क लिजी सिपैनोंक हात मिं दी दे।

तब सिपै यीशु कैं रोमी राजपालक महलक भ्यार बे पटाडण मिं ली गई और उनुल आपणि पुरि पलटण कैं वां बुलै ले। और उनुल यीशु कैं बैगनी रंगक लुकुड़ पैराई जस एक रॉज पैरछी और कॉनोंक एक मुकुट बणैबेर यीशुक ख्वर मिं लगै दे। और उं मजाकल यीशु कैं सलामी दिण भैटीं और यौ कूण भैटीं, "हे, यहूदियोंक रॉजजू, तुमुकैं हमर नमस्कार छु!" और उं यीशुक ख्वर मिं लाकड़क सिंटल मारणाछी और उनुमिं थुकणाछी और फिर मजाकल चौड़ हबेर उनर अधिल बे पैलाग करनै जाणाछी। जब उनुल जमिबेर उनेरि हसि करि हैछी तब उनार बैगनी लुकुड़ कैं उतारिबेर उनुकैं उनरै लुकुड़ पैराई। और फिर उनुकैं सूली मिं चढूणक लिजी वांबे भ्यार ल्याई।

## यीशु सूली मिं चढ़ाई जाणौ

(मरकुस १५:२१-३२, लूका २३:३६-४३)

सिपै यीशु कैं सूली मिं चढूणक लिजी नगरक भ्यार ली जाणाछी। उ बखत कुरेनी शिमोन नामक एक मैस यरुशलेम जैबेर उ बाँट उणौछी। सिपैनोंल उकैं पकड़ौ और यीशुक सूली कैं ली जाणक लिजी मजबूर करि दे। और उं

यीशु कै गुलगुत्ता नामक जाँग मिं लिगेई जैक अर्थ छु खोपड़िक जस जाँग। वां सिपै अंगूरक रस मिं दवाई खितिबेर यीशु कै दिण भैटीं, ताकी उं कील ठोकण पर पीड़ कम चिताओ, पर उनुल नि पेय। वीक बाद उनुल उनुकै कील ठोकिबेर सूली मिं टांकि दे।

और उनार लुकड़ों कै आपस मिं बाँटणक लिजी कि कै कै के मिलो कैबेर परची खितिबेर आपस मिं बाँटि लेई।

जब उनुल यीशु कै सूली मिं चढ़ा, उ बखत रातियक नौ बाज राछी। उनुल उनर सूली मिं यौ दोषपत्र टांकि दे कि यौ यहूदियोंक रॉज छु। और उनर दगाड़ द्वी डॉक लै अलग-अलग सूली मिं चढ़ै राँखछी, एक कै दैण तरफ और दुसर कै बाँ तरफ।

जब यीशुक पास बे मैस जाणाछी, तब उं मुनेय हलकै हलकैबेर कूणाछी, "अरे वाह, तु तो वी छै जो यस कुंछिए कि मि परमेश्वरक घर कै उधारिबेर फिर तीन दिन मिं तैय्यार करि द्यूल। पर तु आँब सूली बे भीमें उतरिबेर आपुं कै बचा!" और इसिकै याजकोंक सैपोल और धर्म गुरुओल लै यीशुकि हसि करी। और उं आपस मिं कूण भैटीं, "यैल दुसरों कै बचा, के यौ आपुं कै नि बचै सकना? अगर यौ मुक्तिदाता छु और सांचि मिं यहूदियोंक रॉज छु, तब उ सूली बे तलि उतरि आल। तब हम विश्वास करुल कि उ परमेश्वरक भेजी जन छु!"

यीशुक बगल मिं लटकाई एक डॉक यीशु धैं कूण लागौ, "तु मुक्तिदाता छै, नै? आँब तु आपुंकेँ यौ सूली बे बचा, और हमुकेँ लै!" लेकिन दुसर डॉकुल उकेँ नड़कैबेर कौ, "के तु परमेश्वर देखि नि डरनै? हमुकेँ हमार करनीक सही सजा मिलि रै, लेकिन इनुल कवे ले कसूर नि करि राँख।" यौ कैबेर वील यीशु धैं कौ, "यीशुज्यू, जब तुम आपण राज मिं आला, तब तुम मिकै नि भुलिया।" तब यीशुल उधैं कौ, "मी तुधैं सांचि कूनू, तु आजै म्यर दगाड़ स्वर्ग मिं हवलै।"

## यीशुकि मौत

(मरकुस १५:३३-४१, मती २७:४६)

दिन दोफरि मिं पुर दुनी मिं अन्यार हौ और तीन बाँजी तलक रौ। तब तीन बाँजी यीशुल आपणि भाषा मिं जोरल पुकारौ, "एलोई, एलोई, लमा सबकतानी?" जैक मतलब छु, "हे म्यर परमेश्वर, हे म्यर परमेश्वर, तुमुल मिकै किलै छोड़ि दे?" यौ सुणिबेर सामणी ठाँड़ हई थ्वाड़ मैसोल कौ, "देखो,

यौ एलियाह नबी कैं पुकारणौ।" इतुक मिं उनुमिं बे एक पनसोखता लगाई डंड लिबेर आ और उकैं सिरक मिं डुबैबेर यीशु कैं चुसणक लिजी लिगो। तब दुसरोल कौ, "रुण दियो, आँब हम देखनू कि एलियाह यकैं बचूणक लिजी उं या नी उण!" यैक बाद यीशुक खाप बे जोरकि अवाज निकलणक बाद उनुल आपण प्राण छोड़ि देई।

तब यरुशलेम मिं परमेश्वरक भवनक पर्द मलि बटी तलि तलक फाटिबेर द्वी टुकुड़ है गोय।

जो रोमी सेनाक सैप यीशुक सामण ठाँड़ है रौछी, वील उनुकैं इसिक मरण कैं देखिबेर कौ, "सांचि मिं यौ मैस परमेश्वरक च्यल छी!"

थ्वाड़ स्यैणी दूर ठाँड़ हबेर देखणाछी। जैमिं मरियम मगदलीनी, सलोमी, और नॉन याकूब और योसेसकि इज मरियम छी। जब यीशु गलील मिं छी तब यौ स्यैणी उनर दगाड़ जांछी और उनेरि सेवा करछी। और वां और लै भौतै स्यैणी छी जो यीशुक दगाड़ यरुशलेम तलक आई छी।



सूली मिं लतकाई यीशु

## यीशुक दफनाई जाण

(मरकुस १५:४२-४७)

आँब ब्याव है गेछी और यौ अरामक दिन हबेर पैलियक दिन छी। वां एक मैस छी जैक नाम यूसुफ छी। उ यहूदी न्यायालयक इज्जतदार मैस छी जो परमेश्वरक राज्यक भौतै इंतजारी मिं छी। उ हिम्मत करिबेर राजपाल पिलातुसक सामण गो और वील उधैं यीशुक लाश मांगी। यौ सुणिबेर पिलातुस चौंक पड़ौ कि उ इदुक जल्दी मरि गो। तब वील सेनाक सैप कैं बुलवैबेर पुछौ कि यीशु कैं मरी कतुक बखत है गो? तब सेनाक सैप बे यौ खबर कैं पैबेर कि यीशु सांचि मिं मरि गो, तब पिलातुसल यूसुफ कैं वीक लाश दिलवै दे।

तब यूसुफल एक कफन खरिदौ और यीशु कै सूली मिंबे उतारौ। और वील उनुकै कफन मिं लपेटिबेर एक बन्द उड्यार मिं खोदी कबर मिं धरि दे और कबरक द्वार मिं एक ठुलौ ढुड लागै दे।<sup>14</sup>

और मरियम मगदलीनी और योसेसकि इज मरियम यौ चै राछी कि उनुकै कां धरणई। और वीक बाद उं घर जैबेर उनुमिं लगूणक लिजी मश्याल और खुशबुदार इत्र तैय्यार करण लागीं।

## कबर मिं पहरदार

(मति २७:६२-६६)

दुसॉर दिन अरामक दिन छी याजकोंक सैपॉल और धर्म गुरुवॉल एक दगाड़ पिलातुसक महल मिं जैबेर उधै कौ, "महारॉज, हमुकै याद छु, कि उ धवक्क बाज यीशुल आपण ज्यून छिना कै रॉखछी, कि मी तिसॉर दिन ज्यून हूंल। यैक लिजी, महारॉज, कबर मिं तिसॉर दिन तलक हिफाजत करणक हुकुम दी जाओ। कै यस नि हो कि वीक शिष्य ऐबेर वीक लाश कै लुकै दियो, और सब मैसों धै कवो कि उं मरियों मिंबे ज्यून है गई। यौ वीक पैलियक शिक्षा हबेर लै जादे खतरनाक हवल!"

यौ सुणिबेर पिलातुसल उनुधै कौ, "ठिक छु, तुम पहरदार ली जाओ और जस लै भल समझछा वीक हिफाजतक तैय्यारी करो।" यैक लिजी उनुल कबरक मूख मिं धरी ढुड मिं मुहर लागै और चौकदार बैठैबेर उ कबरक हिफाजत करण लागीं।

## यीशु ज्यून हुंनी

(मती २८:१-१०, मरकुस १६:१-८, लुका २४:१०-११, यहना २०:३),

दुसॉर दिन रात्ति पर एक ठुल भूचालक दगाड़ परमेश्वरक एक स्वर्गदूत यीशुक कबर मिं आ, और उ कबरक ठुल ढुड कै लुढ़कैबेर उमिं बैठि गोय। वीक मूख चमकदार और लुकुड़ सफेद छी। जब पौहरदारॉल यौ सब देखौ, उं डरिल मरी मैसक चारि है ग्याय।

उ बखत मरियम मगदलीनी और थ्वाड़ दुसॉर स्यैणी खुशबुदार इत्र लिबेर कबर मिं उणाछी कि यीशुक लाश मिं लगूल कैबेर। उं बाँट मिं आपस मिं यौ बात करणाछी, "हमर लिजी कबरक ठुल ढुड कै को हटाल?"

<sup>14</sup> उ बखत यौ एक आम रिवाज छी कि उं मरणक बाद लाश कै एक बन्द उड्यार भितेर धरिबेर दफन करछी।

लेकिन जब उं वां पुजीं, तब उनुल देखौ कि द्वारक टुल ढुड हटी छु! और उं कबरक भितेर गई और यौ देखिबेर उं डरि पड़ीं कि सफेद रंगक लुकुड़ पैरी जवान दैण तरफ बैठि रौ।

तब स्वर्गदूतल उनुधैं कौ, "डरो इन, मी जाणनू कि तुम यीशु कैं चाणाछा जनुकैं सूली मिं चढ़ै रॉखछी। उं यां न्हैतिन, उं ज्यून है गई! जस उनुल कैं रॉखछी, उस्सै हौ। देखो, तुम भली कैं चै लियो। यौ वी जांग छु जां उनुकैं धरि रॉखछी। जलदी जैबेर यौ बात सब शिष्यों कैं बताया। और उनुधैं कया कि तुमुहै पैली उं गलील जॉल, वां तुम उनुकैं देखला।" तब उं स्यैणी खुशील दौड़नै शिष्योंक पास जाण लागीं।

जब उं बाँट मिं छी, तब इनुल एकदम यीशु कैं देखौ, और दौड़-दौड़बेर उनर खुटाँन मिं पड़ि पड़ीं। और यीशुल उनुधैं कौ, "तुम डरो इन! जैबेर म्यार शिष्यों धैं कया कि गलील हुं जाओ, वां उं मिं देखॉल।"

और स्यैणियोंल दौड़बेर शिष्योंक पास जैबेर कौ, "यीशु ज्यून है गई, हमुल उनुकैं देखौ और उनुल हमर दगाड़ बात-चीत लै करी!" लेकिन शिष्योंल उनुधैं कौ, "तुम सब पगली गयाछा!" तब लै पतरस और यहूना दौड़बेर कबर मिं गई कि वां के हौ कैबेर। जब उनुल वां पुजिबेर यीशु मिं खिती कफनक अलावा के नि द्यख, तब उं दंग है ग्याय और लौटिबेर वापिस ऐ ग्याय।

## याजकोंक झुट मशौद

(मती २८:११-१५)

स्यैणियोंक जाणक बाद, कबरक पौहरदारोंल नगर मिं याजकोंक सैपोंक पास जैबेर उनुकैं बता कि के के हौ। तब याजकोंक सैपोंल और प्रधानोंल मिलिबेर यौ फैसॉल करौ कि पौहरदारों कैं रुपैं दिबेर उनुधैं कूल, "तुम मेंसों धैं यस कया, कि जब हम रात मिं सित राछी तब यीशुक शिष्य आई और यीशुक लाश कैं चोरि ली गई। और अगर यौ बात राजपालक कानों तलक पुजि जालि, तब हम उनुकैं समझै द्यूल और तुमुकैं यौ मुशीबत बे बचै ल्यूल।" तब उनुल रुपैं लिबेर उस्सै करौ जस उनुधैं कैं रॉखछी। और उनुल यौ बात यहूदियों मिं फैलै दे।

## शिष्योंक दगाड़ यीशुक भेट और खॉण

(यहूना २०:१६, लुका २४:३७-४५)

यैक बाद जब ब्याव बखत शिष्य यहूदियोंक नेताओंक डरिल घर भितेर घुंच लगैबेर बात करणाछी, तब एकाएक यीशु उनर बीच मिं आई और उनुधैं कौ, "तुमुकैं शांति मिलो!" उं यीशु कैं देखिबेर दंग हबेर सोचण लागी कि कैं यौ कवे भूत तो न्हैं? यीशुल उनुधैं कौ, "तुम सब किलै डरणाछा? तुमुकैं भैम किलै है रौ? म्यर हात और खुट देखो, मी छूं। मी मिं हात लगैबेर देखो कि मी छूं, किलैकि भूत मिं हडिक और मास नि हुंन, जस तुम मी मिं देखणाछा।" यस कैबेर यीशुल आपण हात और खुट दिखाई।

यौ सब देखिबेर उनुकैं खुशीक मारी विश्वास नि हुणौछी और उं दंग हबेर चाइये रै ग्याय। तब यीशुल कौ, "के तुमर पास यां खॉणक लिजी के छा?" उनुल उकैं माँछक एक टुकूण दे, और यीशुल उनर सामण यौ खा।

फिर यीशुल उनुधैं कौ, "जब मी तुमर दगाड़ छी, तब मील कै रॉखछी, कि धर्म-शास्त्र मिं म्यर बारि मिं जे ले लिख रॉखौ, वीक पुर हुण पक्क छु।" यीशुल उनुकैं समझा कि परमेश्वरक वचनक अनुसार मुक्तिदाता कैं आपण महिमाक पद मिलण हबेर पैली भौत दुःख-पीड़ उठैबेर मरण और तिसर दिन फिर ज्यून हुण जरूड़ी छी। और यौ सब कूणक बाद उनर सामण बे यीशु न्है ग्याय।



शिष्योंक सामणि यीशु

## शिष्योंक दगाड़ फिर यीशुक भेट

(यहूना २१:३-१३)

यैक थ्वाड़ बखत बाद पतरसल दुसॉर दगडुवों धैं कौ, "मी माँछ पकड़णक लिजी जानू।" उनुल कौ, "हम लै त्यरै दगाड़ हिटनू।" तब उं माँछ पकड़णक लिजी नाव मिं चढीं और सॉर रात जाव खितीं, पर एक लै माँछ नि मार।

राति हुण बखत यीशु समुद्रक किनॉर मिं आई, पर शिष्योंल उनुकें नि पछ्याण कि उं यीशु छन। यीशुल उनुधैं कौ, "दगडुवो, तुमर पास खाँणक लिजी के छा?" उनुल जवाब दे, "हमर पास के लै न्हैं।" तब यीशुल उनुधैं कौ, "नावक दैण तरफ आपण जाव खितो, तब तुमुकें माँछ मिलाल।" तब उनुल आपण दैण तरफ जाव खिती और उमिं इतुक जादे माँछ लागीं कि उं जाव कै लै नि खेंच सक।

तब यहूनाल पतरस धैं कौ, "यों तो प्रभु छन!" यौ सुणिबेर पतरसल झट्ट कुर्त पैरौ किलैकि वील उ उतारि रॉखछी। और उ यीशुक पास जाणक लिजी पाणि मिं कूद पड़ौ। दुसॉर शिष्य माँछोंल भरी जाव कै खींचबेर बगड़ मिं ली गई।

किनॉर मिं ऐबेर उनुल क्वैल मिं माँछ और र्वाट धरी देखीं। तब यीशुल उनुधैं कौ, "तुमुल ऐल जो माँछ मॉर रॉखीं, उनुमिंबे थ्वाड़ ल्याओ।"

पतरस नाव मिं चढ़िबेर जाव कै किनॉर मिं खींच ल्या। जाव मिं एक सौ तिरपन्न ठुल माँछ छी, इदुक माँछ उ जाव मिं हुण पर लै उ नि फाटि।

तब यीशुल उनुधैं कौ, "आओ, आँब खाँण-पिण खै लियो।" शिष्यों मिंबे कैकणी यौ पुछणकि हिम्मत लै नि हई कि तुम को छा? उं जाणछी कि उं प्रभु छन।

यैक बाद यीशुल उनुकें र्वाट और माँछ खाँणक लिजी देई।

## पतरस कै यीशुक माफि

(यहूना २१:१५-१७)

खाँण खाँणक बाद यीशुल शिमौन पतरस धैं कौ, "शिमौन, यहूनाक च्यला, के तु इनुहै जादा प्रेम मिक्कें करछै?" वील जवाब दे, "प्रभु, तुम जाणछा कि मी तुमुकें प्रेम करनू।" उनुल कौ, "म्यार नॉनतिनोंक याद-फाम कर।"

यीशुल फिर दुसर बारि उधैं कौ, "शिमौन, यहूनाक च्यला, के तु मिधैं प्रेम करछै?" वील कौ, "प्रभु, तुम खुद जाणछा कि मी तुमुकें प्रेम करनू।" यीशुल कौ, "तब तु म्यार मैसोंक देख-भाल कर।"

यीशुल फिर तिसर बारि कौ, "शिमौन, यहूनाक च्यला, के तु मिक्कें प्रेम करछै?" यौ सुणिबेर पतरस कै भौत दुःख हौ कि यीशुल उधैं तिसर बारि यौ पुछौ कि तु मिधैं प्रेम करछै? वील फिर यौ जवाब दे, "प्रभु, तुम सब जाणछा, तुमुकें पत्त छु कि मी तुमुधैं प्रेम करनू!" फिर यीशुल उधैं कौ, "म्यार मैसोंक याद-फाम कर।"

(यीशुल पतरस धैं तीन बार पुछौ कि के तु मिधैं प्रेम करछै, किलैकि पतरसलल पैली यीशु कैं तीन बार इनकार करि देखी। लेकिन यीशुल वीक इनकार नी कर और उकैं माफ करौ, और उकैं बता कि तु फिर लै मेरि सेवा करि सकछै।)

## यीशुक स्वर्ग मिं उठाई जाण

(मती २८:१६-२०, प्रेरितों १:१-१०)

यैक बाद इग्यार शिष्य एक डॉन मिं गई जां जाणक हुकुम यीशुल उनुकैं दी रॉखछी। वां पुजिबेर इनल यीशुकि बढ़ाई करी। लेकिन कैकणी-कैकणी शक लै हौ।

तब यीशु इनर पास आई और इनुधैं कौ, "मिकैं स्वर्ग और धरतिक पुर अधिकार दी रॉखौ। यैक लिजी तुम जैबेर सब जातियोंक मैसों कैं म्यर शिष्य बणाओ और उनुकैं पिता परमेश्वर, मी उनर पुत्र और हमर पवित्र आत्माक नामल पाणिक बपतिस्मा दियो। और मील जो-जो हुकुम तुमुकैं दी रॉखी, तुम उं सब उनुकैं मानण सिखाओ। देखो, मी दुनियाँक अंत तलक हमेशा तुमर दगाड़ रूल।"

उनुल आपण शिष्यों कैं यौ हुकुम दिबेर कौ, "तुम म्यर जाणक बाद यरुशलेम कैं नि छोड़िया, पर परमेश्वरक बातक पुर हुणक इंतजार करिया, जो मील तुमुकैं बतै रॉखछी। जसिक तुमुल यहूना बे पाणिक-बपतिस्मा ले, उसिकै आब तुम परमेश्वर बे पवित्र-आत्माक बपतिस्मा लै पाला।"

शिष्योंल उधैं पुछौ, "हे प्रभु, के तुम रोमियों कैं हरैबेर इस्रायल राज कैं ऐलै दुबार बणाला?" उनुल जबाब दे, "बखत और कालक बारि मिं जो पिता परमेश्वरल ठेरै रॉखौ, वीक बारि मिं तुम नि सोचौ। पर जब पवित्र आत्मा तुमिं आल, तब तुम सामर्थ पाला। और यरुशलेम, यहूदिया, सामरिया और पुर धरतिक वाण-क्वाणों मिं तुम म्यार गवाह ह्वला।"

फिर उनर देखन-देखनै यीशु स्वर्ग मिं उठाई गई, और बादोवल ऐबेर उनुकैं उनर आँखों बे छोप दे।

जब उं मलिकै चैराछी, तब अचानक सफेद लुकुड़ पैरी द्वी मैस उनार सामण ठाँड़ हबेर उनुधैं कूण लागीं, "ओ गलीली मैसों, तुम अगाशक तरफ के चैराछा? यौ यीशु जनुकैं तुम स्वर्ग मिं जाण देखणाछा, एक दिन उं दुबार इसिकै आल।"

यैक बाद शिष्य फिर यरुशलेम आई।